

Ingaibo Melukisadek Lo?

Jeffersonville, Indiana, U.S.A

65-0221E

1 Ketuluroto awokokwes kanuka ailip.

Papa lominat Lokotoma Akuj, ipupi isio ekosio lo loka *Kiyu Aiyuun Bon*, einakini sio ajenun ebe erai ngun bon kes nuibusakinit isio aswam kanu airumun aisumuneta nuka Edeke, aiyuun kes. Naarai iwadikatai, "Epedoros akiro kere mama ejaasi ngul luiyuunitos." Kwape kimonya isio, kwape etunganan je loajaar kede ikoku yen edeka ipum, "Ejakait, eyuunit eong! Kingarak Jo amamus aiyuunika."

Isiyalamikinit isio Jo kanuka apedoriKon naepol, apukokinioKon naepol naka Jo Elopet mamakosi kotoma apaarasia nu nukawasia. Einakinit etaukosi aiyalama noi ka alakara da, kanu aijenun ebe kiriamun isio ka Edeke lokajaran; Loitogogongit ngun kwape nukabeit ainyakun kotoma akuan, ajenanuto nuetakanete, kwape abu Ngesi kiswama kapaarasia nuatuboros, ido kwape abu Ngesi kisumunitor kanuka apaaran kana. Kiyalama isio noi mama ijai Jo Ekosideke. Apak naemutono na naesubitor bala emamei itunganan idio kere yen ejeni neebait alosit, iyalama isio ebe kidum isio aiboisit naka ayuara, nekeriara.

Kwana kisirereng isio lolo, wu Ejakait, kwape kinerar nuka AkirotoKon. Ido aisumuneta nukiinakinitai isio, ketopoloutu isio ngun kotoma otauonokosi, ayangarit kes kwape ibore yen epol etiai kede ainapaara, ka arimar kes kede iponesi lukajokak luteni luka ayongit Edeke. Naarai kilipit isio ngun Kokiror loka Yesu. Amen.

2 [Inerasi icetunganan kede Onac Branham-Ekewa] (Oo, mam ti ngun iswamatai, ainakinet naka amin? Mam kes ti ibusakinit. Mam kes ti iswamatos ngun. Ingaibo abu kiswama ngun? Enyamitos jo akiro?) Ajai eong adolokin ekayaiton. Abala ngesi ebe abu ngesi kijau ainakinet naka amina kanukang. Mam ebusakinit nges ti aswam ngun. Esiyalamikinit eong gun, ejeni Edeke ngun, konye mam eong abunit kanuka ngin. Eyalama. Elipit kisirereng Ejakait yes. Alosi eong aswam kere nuapedori eong. Alosi eong aibwaikin ngun toma ayakian kanuka akwapin nuko kinga, tetere eong ajeni ebe elosete toma Ajakanut naka Edeke. Ido arai itojokit Ejakait, abuni eong ayangar ngun eong elopet, lai je toma akwapin, kanu ayangaun Eijiri lopelo lo lem iboioto yesi kane, kopupokinitos esabiiti lo, aso ajeni do eong ebe eponio aiswamaun ngun koipone loiyuunitotor yesi Ngun. Kingarak eong Ejakait aswam ngun.

Eyalama eong noi kanu itunga luipu labunore aipup kosabiiti kalo, ido kanu yes itunga luikodakina akuare naka lolo bobo kede iwayai luka esimu. Ido iyalama isio mama ejai nginidiopet kayesi.

3 Abu Billy kolimok eong atupuruc na ebe, abala ngesi, "Papa, karai jo kobunite nepepe keong atupuruc na, sek, nepe iwalari akwap, kasodete aibwo kane kotoma aiboisio kanu ido asesen nukatoto itanete idwekec komotoka, itunga ngul lukican iboiete kodou kangol, idaritosi ikekia angaario!" ti jo kiany epone loka etunganan lokesoswai lo ti arai eong karai eong kalimokinite jo Abeit? Iany jo epone lotikaraunor eong lokesoswai karai eong alimonokin yes idiobore ice kilema Abeit? Ti kaitebeikin eong karaun etunganan loerono. Kacepakio ejai eong aiti pipil, konye mam erai ebe naarai akoto eong, erai kanu naarai...Mam erai eong nges ajai aiti pipil. Erai Abeit nges itipipili. Ido, eong-eong...Konye eyuunit eong ebe ngin nges ainakini yes ipote, naarai arai eong loenera kamunonut cut nepepe kayesi, ka aswam kere nuapedori eong aswam kanu aingarakin yes. Kingarak Ejakait kanginidiopet kayesi.

4 Kwana akoto eong aisiyalamikin itunga kanu akeceiswamanar naejok, itunga luko oibuga kane, da, luapotu koinakisi oni, acamakin oni aipagis etogo loka esomero lo, etogo lokapolon lo kaiboisit naerionore akuan. Ido bobo da akoto eong aisiyalamikin ikayaitok luka apugan arai ijaasi yesi ne. akoto bobo eong aisiyalamikin Thurston Colvin, lo da erai edaran aiboisit na, kanu aiswamanarake nepepe kaoni kotoma aingarakin oni adumun aiboisit na ka ajaut da nepepe kaoni ne kanginikuare.

Kisiyalamikinit oni ajore naka ipolisin nako Jeffersonville kanu abunore ne kosodete ainakin ayuara, kanu etiai loedit cut. Aomit eong bala nepetai idolas iarei esawa ediopet, ebe aponi kibwaikinai ipolisin ne kotoma aswam naitegelikina, aipaga amotokan, kanu aanyun ebe amamei e...mam imodiobore abu kiswamaun, ido nginibore kere ajokuna. Kisiyalamikinit itunga kanuka ngun. Ido mama eaji-e, da, bobo, da, eijinia kane kotoma oyaitene, aanyu eong nges. Ka ngul kere luimorikikina nepepe ka nu, kiyalama sio noi mama ijaas yesi.

5 Esiyalamikinit eong kanginidiopet kayesi kanuka ainakineta. Abu Billy koinu eong atibong naka lolo, ainakinet, nuipu kakesi, kede abokisin, eswiit loka araito, ka nuce ngun kere. Ido adiopet kakesi arai Alimununeta Nukarereng, kede aputo naka Kristo inomakinitai tomakec, ngin ka Alimonokin Nakorongat. Ido nabeit arai ngin naebus noi. Nabeit esiyalamikinit eong yes. Ka iboro luipu noi, mam eong ajeni eipone losiyalamikinet yes kanuka ngun. Kosodi do, bobo, da, kanuka akus-aigangakus, aigang airiamun kede api ai, nabeit kisiyalamikinit sio ngun, kede etaukosi kere. Kisirereng Ejakait kanginidiopet kayesi, kabarara.

Abu Billy kotema ebe, ajaasi itunga luipu noi, ijaasi lem yesi ingisitos airiamun naka aingisingisio naka idiopediopen kotoma apak kangin. Ido luipu engisitos ido da ajaatar kede idwe ludidik kanu aisirereng. Oo, epone loakotor eong aswam ngun!

Konye, itei jo, neabunio eong apak na, erai naerai nakatipet noi. Ejai eong asalakin cut, apak kere, toma aisisia, Akirot na ka ailip, kotoma aitolomun Aisiiranareta nu. Koany jo, mam kes eraas...Eraas kesi nuitegelikina noi mamawok, naarai erai ajenun akote naka Edeke kosodi do einer iboro ngul. Ido ngun kere ejai airiamun nepepe, ka aingisite da Edeke ebe anibo ebeit kopukoroi.

6 Kwana, arai kitojokit Edeke, ibonguni bobo isio akaulo na apak naesupaana, kwape katipet kwape naipedoria iso adumun apaaran. Abu eong kasub aomisioit, araibonat-araibonat abu kalimu icebore kanuikamunitos Epasika. Ekoto eong airereor ngin, naarai aomit eong ebe adaunit eong aisumun ajaun California nepetai kotoma apak kangin. Aso epedori aticepak ngin korai naibucara. Eja ngun da, neibongunia isio bobo toma okanisa, kijukakini isio yes akaadi, ka ekanisa da, kasodete ainakin yes apaarasia ka apak. Abuni do eong, aticepak kotoma apak kangin, bobo...

Mam eong ebwaikinit amodiopak kanu ailipanakin lukadekak. Mam oni kijaikina ka aijanakin adio nakipou kayangauniata itunga kasodete ailipanakin kes. Kijai lem oni kijukanari kes kinga. Ido ejaasi lem iinacan wok lu elimonokinete, Onac Lee Vayle ka Onac...Ejaasi lem iinacan luce luelimonokinete, ailipanakin lukadekak, ka aswam aibatis naka akipli, da, ido koyalakinitos eong ajaun bon kanukang nepepe ka Akirot. Apotu kesi kiswamata aswam naepol noi.

7 Ipu noi ipapero luakoto eong airiamunor. Eteluori eong kwap kasodi aanyun John kede Earl. Ido ejai nen Doctor Lee Vayle, ediopet kotoma kalueyaitos airiamun. Onac Roy Borders. Ikiliok ngul, mam ber eong adumunit...mam ber eong eyogaikina ka akan nepepe ka kes da. Mam eong adumunit arereng naka aiyogaikin ka kes. Awomomoi eong nuka ipaperoka luko Kentucky, ka anatar toma ne, kede ipapero lueraasi ikejaanakinak, epone loakotor ti eong aiyoga akaninikec! Onac Blair, abu eong agipa nges kane apaaran ya. Ka luipu kama ejaasi itunga ngul luamina eong, ido ajainikinos kesi toma airiamununeta nuipu noi, ido mam ber eong eyogaikinar noi ka kes da. Ajai eong atamit...mam erai ebe naarai mam eong akoto aswam ngun; erai naarai emamei eong apak naka aswam ngun, ido bon arurukit eong.

8 Aisirereng imukerun, nabeit. Okokuka obe, otataitika yenididi abeit ti aisirerengio kotoma airiamun kana. Mam eong adumunit apak naka aswam ngun; Daudi yenididi. Arai eong da papaa, irwan aarei kwana. Aso, Ejkt. May, arai ejai ngesi ne lolo, loabu kijaik eong ebela ngon, esubit bala abuni eong ageun aitwasam ebela ngol katipet.

Aso, ido abu eong kalimok Billy, abu eong katema ebe, "Ebala Ebaibuli ebe 'Kouriaros kilelebata akwap,' konye mam aponi kijaikinai jo alangiru ngin kere." ido ejaasi itatai lu atakanunun koipone lokatipet noi.

Aso do, kiitutu ebe, aberu okokuka mam arai naauriei, ageun ber sek da. Mam ngin apedori auri idwe. Ido apaaran adiopet, ajai eong anyoun kotoma airiamun, abu Ejakait kinerakinos keong kosodi atemar ebe, "Loyce, ibuni jo aurun ikoku yenitelepat. Esirereng Ejakait jo. Adaun ationis kon naka angor." Kourunete Paul yenididi ngin, akaulo naka ilapio ikanyikaongon.

9 Ilapio iarei eringa ikoku yen ketakanunia, ajai eong eboie, kanyami lukatupuruc katupuruc adiopet, komesa, ido ajaasi Loyce ka Billy iboiete komesa epuwai kama ajai eong. Ido abu eong kaany Loyce ejai aitan ikoku yenididi kede ebilangiti lobululu iswapitere ikoku. Ido ajai Billy iboie kosiep kokoona, kojai aitan Paul yenididi. Abu eong katema ebe, "Billy, eong adaun aanyun aitapoet nepena. Ajai Loyce aitan ikoku kimukitete kede ebilangiti lobululu."

Abu ngesi kotema ebe, "Adau bodo esapalika loka amej. Erai cut ngol ilapio ikanyikaongon anyoun kopekwana."

Akaulo naka ilapio itomonadiop, kourunete Daudi yenididi. Ido mam eong apedorit aijaikin nges mama ejai Ejakait ber, ido mam eong abuni kiton neibongunio sio bobo. Aso ianyutu nueraasi ngun.

10 Epone loaminar eong itunga kede eidicani kec! Konye ejaasi lem iinacanawok ilipanakinete lukadekak, ido ajeni eong ebe erai naekeriana. Kanginikuare kipou kelipanakisi lukadekak, idiopet aidokonokin akaninikec mama ejai yenice, sio kere nepepe, na da koipone kangol ikamuni itunga kere. Konye aticepak, arai ekoto Ejakait...Abuni eong aiwadikaikin ngin toma akaadi, arai kijuk isio ngin. Abongun, akoto eong ainakin nepetai apaarasia aarai arai auni, bobo, bon kanu ailipanakin lukadekak, ka aswam kere nuipedori isio koipone kangon. Kwana, esialamikinit eong itunga kanuka aganganikec, bobo.

11 Kwana akoto eong alimun, apak edit, nuka Aisiiraret naka atupuruc. Emamei abunokin, mam eong abu angetak ngin cut kodoco, konye aomit eong ebe imisiikinitos yesi. Ido ajeni eong ejok cut ebe mam yesi ipotu...Mam cut yes ipote ajenun inyo kerai ngin kanu eong aswam.

Kwana, esubit ngin bala erai naepatana noi mamakus. Konye, yesi-yesi isesenete nuajai eong aswam? Ijaasi jo ayangar aiboisit naka Edeke, alimor Icebore. Ido eringa eong ti kiswamauna ngun, kejai ngin abunore korai abongokinet kama ejai Edeke. Ido ajai Nges adokun kwap, ido abu Ngesi kitodiaar Elopit koipone loetakani, kosodi ainakin Apukokinio ngin. Kanuka ngun, koany, elosete nu mama ejai Ekanisa. Ido kiitu, abu eong katema ebe, "Nu, nu nuabu eong kener, arai mama ajai ekanisa bon."

Ido tetere yes ijaunos kede amun, kosodete ajenun, arai Edeke ngol nges jepeje loabu kolimok eong kokuju kangina kaneamame ekunyuk ebe, "Kiner, ido kolim neepote kesi ajaun." Ido abu ngin kiswamaun aatenak auni kaituputupa. Kwana, arai epedori Ngesi asubun icebore yenamamei kede Akirot kangipekangin, epone bodo ai neebunio Na aicasit kApaaran naka Etube! Iany? Kejaasi itunga nen kanu aanyun iboro lu, kosodete ajenun. Kwape abu Paul kotemaria, kotoma apaarasia nuatuboros. Ajaasi ikiliok nepepe ka nges, luapotu kopuputu amaaran naka akwap; kwabo mam apotu kiirasi eporoto, konye kesi-apotu kesi, apotu kesi koanyutu e-Epir loka Akim.

12 Abu ngin kiswamaik eong nukajokak, keja ace da, akaulo naadaunor ngin, aanyun ikiliok kede angor, luajeni eong ebe eraasi Ikristayon lukabeit, etunanaros bonik komonyete.

Ido kopupokisi, ipapero, itigogongi Edeke AkirotoKe nepepe kaanyununeta ka nuigangitos da, kanu aitigogong ebe erai Ngin naedolit, Akirot ngin naeneritai. Kwana kiitutu, Aica ngin naajai toma Odou ngol, naabu kijaik Apukokinio ngin. Arai eong...

Ajai ipeseke yenididi elimonokini eong, Sara na, ebe neapotu kesi...Ajai esomero ngon kanen ko Arizona kesesenete kuju ngina kuju apak neamamete idouon, ido neanyuniata Edou loetegelikina lo kokuju naka erongat kangon, edokanari kuju-ka-kwap, ka Akim naataluka inepi kotomaKe. Abu ekesisianakinan kitwobou aisisianakin kede esomero kosodi ayangaun kes kinga iingaren, kosodi atemar ebe, "Yesi kiwanyunitotor ibore yen ikoni nen? Koanyutu ber yesi epone loejaar ngin kangina."

Kiitutu, erai ngin Aica ngipengin ya naataluka nges kejai kuju orongat. Aso erai Edeke ngopengol, Apukokinio ngipengin, abala, "Kolimok kes aswam nu." ngun nges nuabu eong kalimok yes atupuruc na, aso nges Ngin nen.

13 Arai katicepak korai ebe ejai opaperoka lominat, Onac Roy Roberson, ejai epupokinit ko Tucson. Roy, iitunit ijo apaaran ya, aitapoet naibu jo koany nakijaar oni kinga kibwoi komoru? Ibu jo kobu mamaka, ido ajai edou ngon kuju? Abu kobu aijesun kwap, ijeni jo nuabu Ngesi kolimok jo; ido abu eong kalimok jo kotogo, apaaran ya? Nges ngun, Roy. Mam iyalongongoe bobo, okoku. Adaunos ngun.

Mam cut yes ijenete apolou naka ngun! Erai asianut. Emina Ngesi jo. Ido imina jo Nges, kijaanak Nges kaiyapepara kosodi aima Nges apaarasiakon kere. Arai iyalama jo, kolot ngaren kopone kangol. Siri bobo kiswama icebore yenaronon, kwa kangin. Inyikok alosit akonye. Erai ngin asianut naka Edeke.

14 Kwana akoto eong ailip bobo eringa oni kelomara toma Akirot. Idi bo elosete ailip kanukang? Ajai cut eong alosit anyoun kairiamun kiton airiamun. Yesi ilosete ipote ailip?

Ijenete yesi, akoto eong ayeikin yes ikosio yenididi, oni kere nepepe, eringa oni kelomara toma Akirot. Kanu bon...tetere oni kijenuni Edeke...Bon iijaikin yenididi. Yesi iiraritor ikosio yenididi yen, *Epodokinit Ngesi Kanukon?* "Kotoma aica naka akolong ka aiturur, epodokinit Ngesi kanukon."

Ejai amucaalat ngin abunore apiano. Atemasi, akoto eong aisiyalamikin amucaalat nadidi na, da. Mam da ber eong abu kajeni arai bo ingai kerai ngesi. Erai adiopet kotoma adwe nuka edikon kane. Abu eong cuticut...Ipeseke kOnac Wheeler yenididi. Apolou kwana ngesi da. Arai ngin ibore yenididi yen eboienenei kakungika, apak naeuriana kokau, kwana do etosom ngin ainakineteke kotoma airam, ido kwana da erami ngin koipone loejijim noi adepar. Ijo iinakini isio aramakineteke kotoma ageun ekosio, iinac? Oni kere nepepe kwana.

Epodokinit Ngesi jo,
Epodokinit Ngesi jo;
Kotoma akolong ka etorube da,
Epodokinit Ngesi jo.

Yesi iminasi ngin? Ayeoto ngin bobo, kere nepepe.

Epodokinit Ngesi jo,
Epodokinit Ngesi jo;
Kotoma akolong ka etorube da,
Epodokinit Ngesi jo.

Onac Dauch, epodokinit Ngesi jo, da, onac. Yesi mam tope iminasi Nges? [Kotemari atukos ebe, "Amen."-Ekewa.]

Ketuluroto awokokwes kwana.

15 Wu Edeke Louisiana, kede aiwadikaet naedit na naka iboro idis kanu alimokin mama ejaasi itunga, ka abongor bobo kanu aijulir nuka atupuruc kana, naarai ngun kes nueponitos itunga aiirar. Elipi eong, Edeke, ebe iinakini Ijo itunga aanyun ebe erai Edeke Loemina kopodokinite da. Ido mam kerai eong nges abu kainak Ngun, wu Ejakait, aponi Ngin kitodiarai ebe kerai Abeit. Kanuka ngun elipi eong, wu Edeke Lominat, ebe kosalakineteke duc aminaKon mama ejaas itunga. Lolo, kanu atiakiatikaun akaulo naka

airiamun kana kasodete alosit oreria kosi luegelegela, esubit ngin bala ibwosuni isio, toma, aidules ace, wu Ejakait. Elipi eong ebe ibuni Jo aisirereng itunga lu.

Kwana kwape kidolokinia Akirot, kotoma ailip, kasodete adolokin Akirot naiwadikatai, kilipi ebe ilemuni Jo Akirot naiwadikatai na kosodi ainakin Nges araun ajar mamakosi lolo. Ido neinyounio isio kotoma aduketait kana lolo atiakatiakaun alosit oreriakosi luegelegela, katemasi isio bala ngul lukepote ko Emao, luapotu koupitos nepepe ka Nges adaun apaaran kere ido komam ejenete Nges kwapekwangin; konye nakitolomaria Ngesi kes toma agola akuare ngin, kosodete agolokin ikekia kere, abu Ngesi kiswama icebore cut kwape kayen abu Ngesi kiswamate eringa aibubuikinioKe. Kanuka ngun, apotu kesi kojenutu ebe ajaru Ngesi bobo.

Kiswama bobo ngun akuare na, wu Ejakait. Kopedoros ngun, kwape egolitere ikekia, kede itukosiKon yenedit yeniboie kane, idaritos. Ido, Papa, neilosio sio oreriakosi, kitemari isio kwa apotu kesi kotemariata ebe, "Mam kereka apotu iwokotauon komulaete neenerar Ngesi kaoni korot!" Kijaikinit isio awatekosi, ka kere, toma akaniniKon, wu Ejakait. Kiswama kasio koipone loitei jo ebe edolit. Kokiror loka Yesu. Amen.

16 Kwana kalomasi toma cut naka aijanakin kwana, katipet. Apukor kwana kede eong, arai ikotosi yesi, toma Oitabo loka Iburanian, ido Apukokinio ace naka Aisiiraret. Kilosi einer kanu apak naesupaana lolo, arai ekoto Ejakait. Ido kwape kisiomia ikokoron iuni lusodit luka Iburanian 7:1 kiton 3, kasodete do einer kotoma kanu. Ido mam kijeni nuelosi Ejakait aswam; mam oni kijeni. Ibore bon yen iswamai oni nges aiyuun, aikweny, ailip. Ngin erai naabeit? Kasodete aiyuun ebe "Ebuni Ngesi ainakin nginibore kere aswam kanuka ajokis mama ejaas ngul lueminasi Nges," naarai abu Ngesi kisumun ngun.

Naarai Melukisadek Ngol, ekabaka loko Salem, esasedoti loka Edeke Loejai kuju kakuj, loeriamunos ka Aburaam naabongunio kajar ikabakan, abu kilipak nges arereng;

Loabu Aburaam kokorak idiopet kotomon koboroke kere. Nasodit, arai ijulakini ekekiror, erai ngesi ekabaka loka adolit, bobo da ekabaka loka Salem, nges atemar ebe ekabaka loka ainapakin.

Kenyikokisi asioman iingaren bobo.

Emamei nges papa, karaida toto, karaida lukapaapake, emamei ageunet naka apaarasiake, karaida esange loka ajarake, konye itupusitoi ka Okoku loka Edeke, esalakinit erai esasedoti apaarasia kere.

17 Kowomoom ber jo nuka Etunganan lo lokapolon, nuka epone loibusakinitor Etunganan korai loepol Etunganan lo! Kosodi kwana, aingiset nges na ebe, "Ingaibo ber Etunganan lo?" Ikesisiak luka Ebaibuli ajaununos kede awomisio nuegelegela. Konye ageun kapukorio naka Aipuceta Akanyikaarei, Eitabo lokaiyeyea lo loationikinit lem oni ajenun...Kwape ebalor kApukokinio 10:1 kiton 7, nukaiyeyea kere nuiwadikatai toma Oitabo lo, nu lem ebwaitai anatar aturio kere nuka ikesiteteunak, ebeit ayangaun aisideleleun kamaka emalaika loka atur nakawasia naka ekanisa. Idi bo ejenete ebe erai ngin naabeit? [Kotemari atukos ebe, "Amen."-Ekewa] Erai ngin naabeit, ebeit aisideleleunio. Nukaiyeyea kere nuka Eitabo lokaiyeyea ebeit apukokin ekiyokia loka Laodikia loka atur kangin.

Kwape kisesenia oni ebe epol noi epeget kanuikamunitos Etunganan lo ka akirot da na, aomit eong ebe ibusakinit do oni abelakin toma kangin, kanu adumun ebe Ingaibo erai lo. Kwana, ejaasi isomeri luipu luka aomisio nuegelegela nuikamunitos Nges.

Ediopet kotoma osomeri eraasi, elimorit ebe, "Kerai bon Ngesi awaragan. Mam cut Nges kerai Etunganan teniteni."

Ido ebakasi luce kwi, ebe, "Kerai esasedotene. Arai ngon esasedotene loka Melukisadek." Erai ngin nges naesubit bala, etakani ejokuna itia mama ejai ewai ngol adepar epone loeseseniata kesi ewai loce je, erai naarai ebalasi kesi ebe kerai esasedotene.

Mam epedori araut ngun, naarai kotoma okokoron 4 ebalor ebe, arai Ngesi Etunganan, "Etunganan." Aso, tetere araut Etunganan, ibusakinit nges kojaatar kepitene, "Etunganan." Mere ainapetai; konye Etunganan! Aso arai mam Nges kerai ainapetai naka esasedotene, mam da Nges kerai awaragan. Arai Ngesi Etunganan

18 Ido Etunganan lo erai loka Ikar Kere. Arai kianyu ijo, "Amameotor Ngesi kapapa. Amamei Nges toto. Mam Nges ajaatar kapak naegeunitor Ngesi. Ido emamei Nges apak naengetakinitor Ngesi." Ido kere loerai Ngesi, eringa Ngesi ejari lolo, naarai ebalor Ebaibuli kane ebe, "Amameotor Ngesi kapapa, karaida toto, ageunet naka apaarasia, araibonat angetakinet naka ajar." Aso ekoto korai ti Etunganan loka Ikar Kere. Ngin erai naabeit? [Kotemari atukos ebe, "Amen."-Ekewa.] Etunganan loka ikaru kere! Aso epedori araut Etunganan ediopet bon, ngol nges Edeke, naarai erai Ngesi bon erai loka Ikaru Kere. Edeke!

Kwana, kotoma 1 Timoteo 6:15 kede 16, arai ikoto jo aisiom ngun apak ace, akoto eong yes aisiom

ngun.

Kwana, ibore yenisodit yen auta eong egangit nges, ebe, Kerai Ngol Edeke, naarai arai Ngesi bon Etunganan loepedori araut lomam etwani. Kosodi kwana, Edeke ijulakin Elopet araun Etunganan; ngun nges nukerai Ngesi, "Amameotor kapapa, amameotor katoto, amameotor kageunet naka aijar, emameotor kangetakineta naka apaarasia."

19 Kwana kidumuni oni kotoma Kanuiwadikatai ebe itunga luipu isisianakineta ngun, "itunga iuni kotoma Eidekeone." Aso, mam jo ipedori ajaut kede ejautenekon komam jo irai itunganan. Eyangaikini etunganan kanu asubun ejautene.

Ekejaanakinan loka Baptist, isabiitin idis kokau, abu kobu togoka, kosodi atemar ebe, "Akoto eong aitetenar jo kotoma Eidekeone apak ace neidumunia jo apak." Abu teni kinomak eong esimu.

Abu eong katema ebe, "Ajaatar eong kapak kwapekwana, naarai akoto eong araut loitetenara, kasodete oni aperikin nginibore kere awai, kanu aswam ngun."

Kosodi ngesi aikeun kuju, abu ngesi kotema ebe, "Onac Branham, isisianakini ijo ebe ejai Edeke ediopet bon."

Abu eong katema ebe, "Eebo, ipa."

Abu ngesi kotema ebe, "Eebo," ebalala ngesi, "Eyuunit eong ebe ejai Edeke ediopet, konye Edeke ediopet kotoma Itunga auni."

Abu eong katema ebe, "Luipa, kobongok ber bobo jo ngun."

Abu ngesi kotema ebe, "Edeke ediopet, kotoma Itunga iuni."

Abu eong katema ebe, "Aibo ibu jo kolot asioman?" Itei jo? Ido abu ngesi kolimok eong ebe okolej loka Ebaibuli. Abu eong katema ebe, "Ti eong eyuu ngun. Mam jo ipedori araut etunganan komam jo irai loijai koponekon. Ido arai irai jo loijai koponekon, irai jo itunganan idiopet mama ijai jo ilopet. Irai jo loitiakuna jo, itunganan idiopet yenikajaran."

Kosodi ngesi atemar, "Eebo, luisisiatos nuka ediini mam da ber epedorete aitetemun ngun."

Abu eong katema ebe, "Erai ngin kanuka apukokinio."

Kosodi ngesi atemar ebe, "Mam eong apedori acamun apukokinio."

Abu eong katema ebe, "Apolouke emamei epone loepedoria Edeke adolokin mamakon, naarai, 'Ibwaitai kakonyen nuka lukacoa, ido epukokinitai mama ejaas idwe ludiddik,' epukokinitai, apukokinio, 'epukokinitai mama ejaas idwe ludidik luepedorete aisisia.'" Ido abu eong katema ebe, "Ti emamei epone lo Edeke adolokin mamakon; igolor ijo elopet awai kama ejai Ngesi."

Ebaibuli kere erai apukokinio naka Edeke. Ekanisa kere erai loedukokinitai mama ejai apukokinio naka Edeke. Emamei bobo epone ece loka ajenun Edeke, erai bon kanuka apukokinio. "Mama ejai yenepukokini Okoku Ngesi." Apukokinio; nginibore kere erai apukokinio. Aso, kanu ai-...Kanuka amamus acamun apukokinio, irai do bon jo ekesisian aisisianakineta naka itunga, ido emamei amuno kanukon.

20 Kwana, kwana, idumuni oni ebe Etunganan lo "amamei papa, amamei toto, amamei ageunet naka apaarasia araibonat angetakineta naka aijar." Kerai Edeke, *en morphe*

Kwana, akwapin, elomuni akirot, akirot naka Ayonanin, apolouke ebe "aijulakin," aponi kitosomai. Aijulakin Elopet, *en morphe*, kama ejai Itunganan idiopet kiton...Itunganan idiopet, akirot ngin naka Ayonanin kanen, *en morphe*, apolouke...aponi kolemunai kotoma aitodiaret mutan ace kotoma abolia, itunganan idiopet ijulanakini ereeteke, kanu araun itunganan yen egelara.

Bala toma-toma, pac, eyuunit eong, Rebekah, nepe eringa nges kinumunuma angetakin asioman, ajaatar kesi kede adiopet kotoma aboliasio nuka Shakespeare. Ido ajai esapat ediopet aijulujul igoeneke irwan nuipu, naarai abu ngesi kobolia atutubena aarei arai auni nuegelegela; konye, itunganan idiopet ngipengin. Abu ngesi kolom kinga, apak adiopet, arai ngesi emokorat; ido neatupakini nealomunia ngesi kinga, arai bobo ngesi lokepone ece. Dodo kwana akirot naka Ayonanin ebe, *en morphe*, apolouke ngesi "abu kijulak aimukoreteke."

21 Ido ngun kes nuabu Edeke kiswama. Erai Edeke ediopet ngopengol apak kere. Edeke kotoma ojautene loka araut Papa, Emoyo, Epir loka Akim. Edeke ngopengol loabu kitodiar kosodi aiboiorori kakidingos wok, *en morphe*, itolomunitai kinga tetere epedorio aanyun Ngesi. Kosodi kereka kwana Edeke ngopengol nges Emoyo Lokalaunan. Papa, Okoku, Emoyo...Mere Idekesio iuni; iyapiesin iuni, aswamisio auni naka Edeke ediopet Ngopengol.

Abala Ebaibuli ebe, "Ejai Edeke ediopet," mere iuni. Ido epone ngol ebe nges mam kes apotu kopedoriat...Mam jo ipedori araut yenitetenaara ido kojaatar jo ka Idekesio iuni. Mam ti jo kipedo aitwegelikin ngun mama ejai Eyudayat. Alimokini eong yes ngun. Ediopet loejeni ejok, ejeni ngesi ebe ejai Edeke ediopet bon.

22 Koany, bala aput naikeunitai, ibwai ngol, kede aimukoret kokuju naka ngin. Ngun kes nueswamaiki Edeke mama ejai atur na. Erai na lem ibwaitai. iboro lu kere ebwaitai lem, ido ebeit apukorio kotoma atur kana. Kwana, ebala Ebaibuli ebe epukorio kes kapakio nukokau. Esubit bala loikey aputosia idarit aswamuke erapitai kere kiton apak naelemaria ngesi aimukoret awai kama ejai ngin ido engin do kanen.

Ido ngun kes nu lem arai Ebaibuli. Erai lem ngin aswam naka Edeke naemukoritai. Ido ibwaitai lem ageun kapetetai naka akwap, ido erai aiyeyea naejai kotoma atutubeta akanyikaarei. Ido abu Edeke kisumun kotoma apaaran kana, kotoma atur naka ekanisa loka Laodikia lo, abuni Ngesi alemar aimukoret awai kama ejai ibore ngin kere kasodete do oni apedor aanyun Ibore Ngin. Otukui ibore bo yen yenikaibuses!

Edeke, *en morphe*, imukoro kotoma Opir loka Akim. Edeke, *en morphe*, kotoma etunganan loenyaritai Yesu. Edeke, *en morphe*, kotoma OkanisaKe. Edeke kokuju wok, Edeke ejaasi kaoni, Edeke ejai tomawok; aijesitai kwap naka Edeke.

Kokuju Kangina, elaunit, amamei idiotunganan apedori atiror Ngesi; abu Ngesi kiboikin kuuju naka emoru, ido da ber karai itiang kotirorite emoru ngon, kejai ngin atwanare.

Kosodi do Edeke adokun kwap kosodi aijulakin eidukuruKe, kosodi adokun kwap kosodi aiboi kaoni, araun idiopet kaoni. "Kasodete oni atiror Nges," ebala Ebaibuli. 1 Timoteo 3:16, "Komam abunonokin epol noi aiyeyea naka ayongit Edeke; naarai abu Edeke kitodiar kotoma akuan, katirosi da Nges kede akanin wok." Abu Edeke konyam akiring. Abu Edeke komat akipi. Abu Edeke kojotoor. Abu Edeke komony. Arai Edeke ediopet kaoni. Erai ngin naibus noi, itupusitai kotoma Obaibuli!

Edeke ngon ajai kuujuwok; kwana erai Edeke kotomawok, Emoyo Lokalaunan. Mere Etunganan Lokiuinet; Etunganan ediopet ngopengol!

23 Abu Edeke kodoku kwap kosodi araun akuan, kosodi atwanare atwanare ya, kotoma Kristo; tetere Nges epedori aitalaun Ekanisa, tetere elomari tomake, kanu aimor eidicane. Erai kanuka ngun nges abu Ngesi nasodit kosubunia etunganan, kerai kanuka eidicane; iboiei Edeke bon, kede Ikerubin.

Ido koany kwana, abu Ngesi kiswamau etunganan, kosodi etunganan aibiror. Aso kosodi Ngesi abunore kwap alakun etunganan, naarai emina Edeke Amaio. Akivot ngipengin ebe *edeke* apolouke ebe, "ibore yen emaio."

Ido na naebunene akidingosiwok, kwape Epir loka Akim, kwape icebore yen ijulakini itauon wok, ngopengol nges Edeke loabu kotema ebe, "Kojaun aica," ido abu aica kojaun. Arai Ngesi Ngopengol bian, lolo, ka ikaru kere.

24 Kwana kotoma ageunet eboie Edeke bon, kede ngun nuajaasi tomaKe, kwape abu eong keneritor katupuruc kana. Ngun kes aomisioKe. Amamei ibore ajai, kerai Edeke bon, konye ajaatar Ngesi kede awomisio.

Kwape epedoria ekenoman epone loedukere itogoi aiboikin kwap, kotoma awomisioKe, kosodi ainomun nnewomit ngesi ebe erai ngin, ibore yen elosi ngesi adukun. Aisub, kwana mam nges epedori aisub. Epedori ngesi alemun icebore yen edaunitai aisub kosodi aijulakin ngin kojaun toma ojutene ece; naarai Edeke bon nges erot ediopet...Nges bon epedori aisub. Konye edumuni ngesi kotoma aomisioke ngun nuelosi ngesi aswam, ido ngun kes aomisioke, ngun kes nuipuda ngesi. Kwana erai ngin aomisioit, kosodi konyet ngesi alimun ngun, ido eraun do kwana akivot.

Ido akivot erai aomisioit, neitodiaror, erai akivot. Aomisioit naitodiara nges akivot, konye ejai ber nges araun awomisioit ber. Aso, eraas ngun nuejaasi mama ejai Edeke, koraun do awomisioit, kosodi do akivot.

25 Koany. Ngul luejaatar, lolo, kAijar naka Ikaru kere, kejaasi nepepe ka Nges ido tomaKe, toma aoomoKe, eringa ber kejauna Emalaika, aicerit, Ekerubit, araibonat idiobore kere. Erai Ngin nges naka Ikaru kere. Ido arai ijaatar jo kede Aijar naka Ikaru kere, kijai duc jo. Mere ajaut kon ne, konye epone ka aput naabu Edeke Loemamei eikor loka aijeneKe....

Ido arai mam Nges erai loemamei eikor loka aijeneKe, mam do Nges erai Edeke. Icorakinitai Edeke araut loemamei eikor loka aijeneKe. Kirai oni luikijaar ka eikor loka aijenewok; Ngesi erai loemamei eikor loka aijeneKe. Kerai Ngesi lokejai aiboisio kere, lokejani iboro kere, ido lokapedor kere. Arai mam Nges erai, apolouke mam Ngesi epedori araut Edeke. Ejeni iboro kere, aiboisio kere, kanuka ajauteKe toma aiboisio kere. AijeneKe iboro kere einakini Nges ajaut toma aiboisio kere. Erai Ngesi Ekajaran; mam Nges esubit bala ekwam. Erai Ngesi Ekajaran; iboie Ngesi kotogo. Konye kanu araut loejeni iboro kere, aijen iboro

kere, einakini ngin Nges araut loejai toma aiboisio kere, naarai ejeni Ngesi nginibore kere yen iswama.

Mam epedori ilacit airwakakin akonyeneke konye komam Ngesi abu kojoni ngun. Ido abu Ngesi kojoni ngun eringa akwap kejauna, irwan nualosi ngin airwakanakinia akekonye, kede akinyet naetia ai ajaatar ngin toma akonyeke. Erai ngin amamus keikor loka aijen. Mam oni kipedori ainomanar ngun kasodete ajenun kotoma awomisiowok, konye Edeke Nges Ngol. Edeke, emamei eikor loka aijen!

26 Ido kiitu, ijo, akonyenekon, ejautenekon, kere nukirai sek ijo, kijai jo toma aoomomoKe kotoma ageunet. Ido ibore bon yen irai jo nges aitodiaret, akirot. Akaulo na Nges aoomoom ngun, abu Ngesi kolim ngun, kosodi kwana do ijo yen kane. Arai mam ngin erai, arai mam jo ibu kojai toma aomisioKe, ti emamei epone edio kere lo tikijaunor jo ne, naarai erai Nges einakini Aijar naka Ikaru kere.

Iitunitos yesi eipone loapotu oni kasiomatar Nuiwadikatai? "Mere yen ekoto, araibonat ngol loekeri, konye Edeke!" Ido tetere aineruniKe nasek ebwoi korai nakabeit, apedori ngesi asekun, eringa adiopak kere, ingai. Erai edeke lokapolon kakere kotoma asekuniKe. Ijo lem jo kojoni kwangin? Erai Edeke lokapolon kakere.

Ingaibo ajai ngina kolo kanu alimokin Nges epone loejok loabeitor asubun akwap? Ingaibo ti ketitingior alimokin Nges ebe ajai Ngesi aswam aswamuKe erono?

Karaida Akirot alopet, erai nakapolon kakere. Karaida Apukokinio erai nakapolon kakere. "Epukokini Ngesi mama ejai yen ekoto Ngesi apukokin." Apukokinio da alopet, erai nakapolon kakere kama ejai Edeke. Ngon nges epone loerukioto itunga iboro, ido ainomonom iboro, komam ejenete nuiswamaete kesi. Erai Edeke lokapolon kakere kotoma aswamisiKe.

27 Kwana idumuni oni Ngesi kageunet, nuitijenaritos Nges. Ido, kwana, kijai jo nepepe ka Nges kapak kangin. Kanen nges ebunio Eitabo loka Aijar aideleleun.

Kwana, kisiomi oni kane kotoma Apukokinio esula lo13, ekokoro lo 8, ebe, "Etiang ngol loebuni toma akwap kotoma apaarasia nukawasia, "Elosi aitapaar itunga luejaasi toma akwap, lumam iwadikatai ikiroriakec toma Oitabo loka Aijar eringa kepesikina apetetai naka akwap."

Aoomomoi eong nuka ngin! Eringa ber keuruna Yesu, ikaru ilukumin iwongon eringa Nges kebuno toma akwap, kede ikaru luipu noi eringa jo da kebunio toma akwap, Yesu, kotoma aomisio nuka Edeke, abu kotwana kanuka arokisio nuka akwapin, kosodete asubun Eitabo loka Aijar, ido aponi ekirorikon kibwaikinai Oitabo ngol eringa kepesikina apetetai naka akwap. Erai ngin Abeit naka Ebaibuli. Koany jo, erai ekirorikon loabu Edeke kicorak sek kosodi aibwaikin toma Oitabo loka Aijar eringa kepesikina apetetai naka akwap.

Ijai jo ngina toma kanuitodiaritos Ngesi. Mam jo iitunit ngun, mam, naarai irai jo atutubet naka AijaraKe. Irai jo atutubet naka Edeke neiraunor jo okoku arai akoku naka Edeke.

Kwape iraar jo atutubet naka papakon lokakwap! Erai ngin naabeit. Irai jo. Ekiliokit nges edakit aokot nuka aur, aokot. Ido neelomariata ngun toma abeet, irau do jo atutubet naka papakon; ido totokon erai atutubet naka papakon, ngesida; aso yes do kere iras atutubet naka papakon.

Aibuses! Egolori ngin ediini kinga, cut. Uh-huh. Abeit cut egolori! Edeke kotoma akere, nges aiboisit adiopet bon!

28 Koany kwana naitijenarit Nges. Apolouke ngin naitijenarit nges kerai, ber, Edeke; aomisioit, naitijenarit nges alopet, kere kama ejai Ediopet, komam erai naitodiaritai. Kanen do, neetodiara Ngesi, iyareikini, koraun do Ngesi Akirot. "Koraun Akirot akuan, kiboiororoi kamawok."

Yokana Lokalaunan esula lo1 ka ekokoro da lo1, koany, erai na, "Kageunet." Konye, sek ber eringa, Loka Ikaru kere! Koany, "Kageunet ajai Akirot." Neageunia apak, arai Akirot. Konye eringa ber kerauna Akirot, arai epone loajenitore Ngesi, aomisioit. Kosodete konyet aitodiar ngin, "Kageunet ajai," aitodiaret, "Akirot."

Kwana, ijai oni adolokin mama ejai Melukisadek. Erai ngon Etunganan lo loitegelikina. "Kageunet ajai Akirot, ajai Akirot mama ejai Edeke, korai Akirot Edeke." "Koraun Akirot akuan, kiboiororoi kamawok." Ikamu ngin kwana, koany.

EjauteneKe losodit arai Emoyo, Edeke, lokapedor nakomoyo, mam ace, loepol loka Ikaru kere. Iyareikini, abu Ngesi kogeu asubun Elopel toma aput naka akuan, kotoma akuan ngin naenyaritai ebe *teopani* enyaritai ebe, "Akirot, akuan." Lo do nges ejautene loajai Ngesi toma naeriamunotor Ngesi kAburaam, anyaritai Nges Melukisadek. Ajai Ngesi toma ojautene loka akuan naka teopani. Kwana, kiponi oni alomar toma kangun kasodete aitigogong ngin kotoma odakikan idis, arai itojokit Ejakait. Kerai Ngesi Akirot.

29 Teopani erai ibore yenimam jo tikipedo aanyun. Epedori ti ajaut ne kopekwana, konye ca komam jo

ipedori aanyun nges.

Eputosi bala, eebo, bala etelebision. Ejai ngol toma ayaetai ece. Etelebision; ejaasi itunga elosete aitorite toma agola na kwapekwana, ewoete; ejaasi ijesezio, da. Konye akonye erai naebilakina bon mama ejaas apupeta akany...Araut kon yenijari erai kere naebilakina mama ejaas apupeta ngun akany, arai ti gwai. Ido irai bon ijo yenibilakina mama ejaas ngun nuacamakin akongu apedor aanyun. Konye ejai ayaetai ace naepedorio aanyun kanuka aijulakinio, kanuka etelebision.

Kwana, mam etelebision esubuni aput. Itetenari bon etelebision ngin toma airimokinet, kosodi do alabira naesesenere etelebision aikopun ngin kanen. Konye aputo ngin ejai nen, kanu ber ageun kede. Ajai etelebision ne nejaar Adam ne. Ajai etelebision ne nejaar Eliya kuju naka Emoru Karamel. Ajai etelebision ne nealasio Yesu loka Nasaret koitoliman luko Galilaya. Konye ijaas do kwana yesi angicun nges ebe ejai. Mam ti kes kiyuutu ngun kokau kangina kolo. Ti jo irai loemunaara akou kanu alimun icebore yen epone kwa kangin. Konye kwana araun do ibore ilopet.

Ido kopekwangin nges ejaar, ebe ejai Kristo ne, ejaasi Imalaikan luka Edeke ne. Ido apaaran ace, kotoma Apugan naka Ikaru Elukumit naebunit, ebuni araun naetakani adepar etelebision, araibonat imodiobore kere, naarai ejaasi kesi ne.

Epukor Ngesi Elopel kotoma aputoKe naepol naka ngun nuabu Ngesi kolimite, kwape ejaar Ngesi Elopel araun *en morphe* toma obulesiniKe kosodi Elopel aitigogongor loerai Ngesi.

Kwana, kane erai Ngesi loejai toma aputo naka Emoyo. Kosodi konyet Ngesi abunore kotoma aputo naka e... naka *en morphe*. Kwana,abu Ngesi kotakanikin Aburaam, *en morphe*. Nejaar Aburaam ebonguni kama kaiar ikabakan kwi, kane kobuni Melukisadek, abu kinerakinos ka Nges.

30 Apaaran ya kotoma apapula nako Tucson, ajai eong asiomi aiwadikaet, nejaar aberu naederepai aijesar korot, eyuunit eong nepetai isipiidin akaisaongon araibonat akaisakany, kosodi ainang epolon, loanapit ekooti. Abu ngin kiluluk kosodi aitobwoun emotoka ke. Abu ngin kiucu epolon kuju apak. Cut kinga nen amodingot naelererei! Kosodi ngin akeriar kanu amoun nges, ido amemei epolon kanen. Aso nunyoika abu ngesi kiswama? Aanyunitos icetunga luajaasi kauke ngun iswamaunos, apotu koanyutu epolon eporori kuju toma apak, kede ekootike iwolor kuju. Aso apotu kesi kokeriasi kau kanu amoun. Mam kes apedorete adumun etunganan ngol kanenidio kere. Apotu kesi konyarautu ipolisin. Kopote ipolisin aanyanar aiboisit ngin, amamei imodiotunganan kanen.

Eebo, kanginidiopet kakesi kere abu kitijena ebe, "Abu emotoka kiretu, konangi etunganan. Abu ngesi koporo kuju toma apak, ido nginitunganan kere abu koany ngun." Ikajenak, ido atukosiakec nuka ikalotok lueleleba nepetai amotokan aarei arai auni, apotu koanyutu ngun iswamaunos. Adumun do ebe, ikaru ikany kokau, ajai epolon loanapit ekooti, loaponi konangai kosodi atwanare kotoma aiboisit kangipekangin.

Neinyounio jo kane, mam jo itwanit. Ejai jo abongun, karaida irai jo ekadiakanaran, kosodete do atubokin kwape ejaatar aswamisio nuiswamatai kotoma akuan kana." "Arai emunauna iswam yenika akwap kana, kija kanaidarit." *En morphe*, ngin nges Akirok.

31 Kwana, Edeke, kotoma adoketait na naka...Erai adoketait na naka esubeKe, ekaulo abu kosubun araun akuan, Yesu. Kama ejai inyo? Kama kageunet napolon, Emoyo, kosodi konyet aijesun kwap araun Akirok, ejai Elopel alomun kinga, Mam Akirok ber iswamaun Alopel, abu bon kolimor, *en morphe*, ekaulo konyet koraun Ngesi akuan, Yesu, loetwani, aiir atwanare kanuwok ikadiakanarak kere.

Naeriamunotor Aburaam kaNges, arai Ngesi Melukisadek. Elacunit Ngesi kane nuelosete atutubeta kere aswam kawasia naka awasia, Okoku kere loka Aburaam. Okoku kere loka Aiyuun kangin ebuni aswam ibore ngipengin. Konye akoto eong asesen eipone loebeitor oni abunore.

Bobo da, ianyuni oni Nges epukoritai kane kotoma Rusi ka-ka Boas, kwape Ekalakunan Lopajan, epone lokibusakinitor Nges abunore araun akuan.

32 Kwana kiseseni oni atutubet, odwe luka EmoyoKe, eringa ber kelomara toma akuan naka aputo naka Akirok. araut Akirok. Konye, e teopani; akuan na erai naebilakina mama ejai Akirok ka aititinget,aidarit aititinget, aijulakinio naka akuan.

Kwana, atiaketait kiding Nges kede jo, kwape okoku. Koany jo, kerai Ngesi, kotoma ageunet, Akirok, akuan naka *en morphe*. Abu Ngesi kolom toma kosodi ajar kotoma kangin, kotoma Etunganan loka Melukisadek. Konyet do, ekaulo, mam oni kipou keirasi bobo nuka Melukisadek, naarai abu Ngesi koraun Yesu Kristo. Melukisadek kerai Esasedoti, konye abu Ngesi koraun Yesu Kristo. Kwana, ibu jo kinac ngin. Naarai, kotoma aputo kangin, ajeni Ngesi iboro kere, ido mam cut kereka jo ipedoritor ajenun ngun ber.

Ibunit jo bala Adam, bala eong, ibu jo koraun kama ejai awomisioit arasun akuan, tetere kitemio. Konye needaunor ajar na kane, "Arai emunauna iswamuwok yenika akwap kana yenikiboiororor, kija kadiopet naidarit." Ngina nges kilosi oni; ngin nges Akirok. Kanen kipedori do oni angoleikin kau kosodete

aanyun nukiswamat oni. Kwana mam oni kijeni ngun. Mam cut oni kiiritor araun Akirot; kirauna bon oni etunganan loka akuan, mere Akirot.

Konye, ido koany, itacaunit ngin kocae kotenan, mam cut jo ibuni araun Akirot arai mam sek ber ijo irai aomisioit kotoma ageunet. Itigogongorit ngin ainerun sek naka Edeke. Iany jo? Mam jo ipedori araut Akirot arai mam jo irai awomisioit. Ajai jo ajaut toma aomoom, ber.

Konye, teijo, kanu abwoikin aitemio, ajai jo ainac akuan ngin naka teopani. Ajai jo abunore kwap ne kotoma akuan, kanu aitemio kede adiakar. Kosodi do, arai kibwo jo, "Kere lueinakinit eong Papa epote mama ajai Eong, ido etajaruni Eong nges kapaarasia nukawasia." Koany jo, ajai jo ajaut ber nasodit.

33 Kosodi konyet do, tei jo, abu Ngesi kijesun cut kwap, aitorun erot lope duc, kama kaomisioit ton...Eringa kepesikina apetetait naka akwap, ibwaikinitai ekirorike toma Oitabo loka Aijar loka Imerekak. Aso do, abu Ngesi koraun Akirot, akuan naka teopani, naapedori atakanun, aolioor. Kosodi konyet Ngesi araun akuan kosodi abongun bobo, aitajarun akuan ngipengin kotoma ojautene loitubusikinitai.

Konye ibu jo kinac akuan ngin naka teopani kosodi araun etunganan loka akuan, kanu aitemio kede aronis. Kosodi do, "Arai emunauna iswamuwok yenika akwap kana yenikiboiororor, kija kana idarit." Kimameotor ber oni kede awate.

Konye, koany! Neijaunia akuan na Emoyo loka Edeke, Aijar namam etwani naejai tomakon, ecakakini akuan na toma arimarit Edeke. Aleluya! "Ngin yeneurit Edeke mam iswamai aronis; mam nges epedori aswam aronis." Iromayon 8:1, "Naarai do kwana emamei do ngul luejaasi toma Kristo Yesu atubokinio; mam elosete kwape ejaar akuan konye elosete kwape ejaar Emoyo." Aso bodo kwana jo. Itei jo, einakini ngin akuanakon abilakin.

Mam ibusakinit jo etemar ebe, "Oo, karai eong kapedori ajalakin emeret! Karai bon eong kapedori..." Koloma alomar toma naka Kristo, ido enyounete ngun kere, teijo, teijo, naarai erimarit akuanakon Emoyo. Mam bobo erimarit iboro luka akwapin; atwakata iboro ngun. Etwakitos: edaikin adianaretakon kotoma aibatisao, ido irai kwana jo isubat yenitetet kotoma Kristo. Ido akuanakon, araun naerimarit Emoyo, kotam aijar epone loka aijar naedolit.

34 Esubit bala yes angor alimorit ebe ijaatar yesi kEmoyo Lokalaunan, kwabo kolosete yesi kinga nen konapitos ipalei luwuriesik ka iboro kwa nat kangul, epone ali tikipedoriata yesi aswamata ngun? Epone ber ali cut epedoria Emoyo loka Edeke acamakin jo aswam ibore yen ikoni nen? Mam cut epedori aikonakin nen. Abeit bo, mam epedor araun kwangin. Mam Nges erai Emoyo loesilliana; erai Ngesi ti emoyo lokalaunan.

Kosodi konyet do neibilakinor jo neejai Emoyo ngol, ecakakini ngesi abilakina kon kere neejai Emoyo ngol, ido mam Emoyo ngol erai ibore kotoma akwapin kilema Akirot na Nakinyomit itodiara, araibonat einakinitai aijar, aleluya, itaraunitai naejari. Ido neebalar Ebaibuli, "Siri kiswama nu," katipet ibelokin akuan ngin mama ejai Ngin. Emamei aingiset.

Ido inyobo ngin? Erai ngin aititinget naka ajarun. Itajarunio akuan na bobo, naarai edaunitai aitegear sek. Kerai ber sek ngesi nabilakina mama ejai aronis ka amodokok ka amunauna, konye kwana ejaatar ka aititinget; edaunitai ngin aibelokin araun naka Akuj. Kwana, ngin nges aititinget ebe ilosi jo toma Awuruporio. Erai ngin aititinget.

Itunganan yen edeka eperi, kojai atwanare, emamei bobo ibore esalit kilema atwanare bon; ngun bon kes epedorete aiswamaun. Aanyunun eong itoribei luka itunga, luedaunit engoti ka adeka naka elweera anyamar; kasodi aanyun itunga ngul, apak edit akaulo naka ngin, engaleete cut ejok ido kogogong. Arai emamei aitangale naka Edeke, apolouke emamei bodo ajarun, naarai aitangale naka Edeke nges aititinget naka aitajarunio. Amen!

Ijeni jo ibore yen eraasi isirigin luka aititinget, mere kwangin? Erai isirigin lusodit atacio. "Aponi Ngesi kimusungai kanu aronisiwok; imacariniKe kes kitangaleunete oni." Koany ber jo epone loeumokinar! Imina oni Nges.

35 Kwana, akuan na erai naebilakina mama ejai Emoyo. Mam ber elomarit toma aput naka Akirot, konye iringa ber oni kijai toma aputo naka akuan, konye kabilakina mama ejai Akirot. Atwanare kotoma akuan nges kiyangari oni ngina.

Ibore cut ngipengin, koomoom ber jo nuka imukeru yenididi. Ipedori jo ayangar aberu, mam ace arai erono aberu ngin biai, kapak naepotio ngesi ido kojai akapanakin kanu araun toto. Kosesen, eringa kidouno imukeru ngin, mam eong apodo arai emumu aberu ngin epone ali, eraun naesiana cut neeteni. Ejai icebore yenikamunit eporotoke...esubit bala eyongit edeke, anyun iberu yenididi ejai aitemonokin araun toto, kanuka imukeru. Kanukinyo bo ngun? Ikuan yenididi ngin, kwana, mam ber ejari, koany, ibore bon erai ngesi nges akiring ka amoori. Asomitoi napetai ngin, eraas ngun amoori eriyonoros. Konye ne elomunia kinga kotoma akoik, iyengakini Edeke eyengane loka aijar tomake, kodelori do ngesi. Koany, cut

kwape-kwape naejena cut kwape ejaar akuan naaduc aiswamaunio, ejai akuan nakomoyo kanu aijaun ngin katipet nepe edoluni ngesi ne.

36 Doodo, naeuruunere etunganan irwan nakiyareit, kama koKuju, eraun ngesi imukeru yenimoyo kotoma Kristo.

Kosodi, konyet do, ne elacarere elou lo loka akuan, ejai akuan, teopani, akuan naitubusikinitai, akuan na mam esubitai ka akanin, namam da eurit aberu, nakilosoni toma.

Kobonguni konyet do akuan ngin kosodi alemun akuan naitubusikinitai.

Kanuka ngun nges alosio Yesu okatwak neabu Ngesi kotwania, kosodi alimonokin mama ajaasi imoyon luajaasi aidaris; abu kobongo toma oteopani ngin. Oo, eumokina noi! Imalai Edeke!

Ikorinton Lokiareit 5:1, "Arai emunauna akuan na nakakwap, iswam yen yenikakwap, kijaar oni ka ace." Koany, kidau oni ainac ngin, arasun abunore kama ejai Edeke, awomisioit; araun akuan, kanu aitemio ka aigimorio kede aronis, kwape abu Adam kiswama. Konye ne edaunor aigimorio naka AkirotoKe, koyangarete konyet do oni mama ejai akuan na naetemonokinitai kanuwok eringa kepesikina apetetait naka akwap. Erai Akirok kanen nges kipou oni kadepasi, kanu cut abunore ne, kwap ne kanu aigimorio ka aitemio. Karai oni ketorunitos mama ejai ngin, ti emamei bobo aitemio; ti oni ijeni iboro kere. Ngin nges ainakinit Yesu ejeni iboro kere; naarai arai Ngesi Akirok eringa Nges kerauna akuan. Konyet do kiraun oni Akirok.

Kane kisubunitai oni toma aput naka Akirok, kanu araut ekamoran loka Akirok, aimuj Akirok, koipone loka araut yen kinerunitai sek ageun kageunet; itei jo aimiliaunet nadidi ngin naka Aijar nakijaatar ijo kotoma ageunet, nekigeunia ijo alositekon? Luipu kayesi epedorete aaitun ngun. Ibu jo kimorikikin okanisa /o kosodi aimorikikin okanisa je, itami jo aswam nu ka kwa; amamei ibore esimonikini jo. Erai ngin abeit. Konye apaaran adiopet ibu jo kojenu Ngin. Eebo.

37 Akuare ya ajai eong esisianakini kanenice, awomit eong bala arai kalaije ko California araimam Arizona, nepetai...eyuunit eong bala adaunit eong alimokin yes iwaragan yenididi ngin kane, kanuikamunitos etunganan loajaatar kakokor naerukumit ido kibwaikinite abeit naka emorukaalet kwap naka akokor. Ido neabekunor imorukaalet ngin, arai ngin ikweny yen asil kakere kotoma okweny luawanyunitotor akokorei. Konye, alosi ngesi da kanen kede kes. Kerai ngesi yenasil kakidingosikec, naarai mam nges apedori amisiikin eipone loekutukutio akokor ngin kosodi aikwerikwer atukos naka agasia ngin ido ainyam. Mam nges apedori adumun aomisioit ngin. Atemari ngesi ebe, "Kobia ne kenumunumata, lominat!" Konye arai ngesi emorukaalet; mam nges anyami kopone kangol. Mam ngun araasi inyam.

Aso ekami ngesi iberei kede luce ngun kere, ijeni bo jo, kosodi anyaraun imioi, klak kwangin, ainyam. Konye imorukaalet yenididi ngin mam apedori aswam ngun. Mam ngin asubit bala arai naebusakinit kama ajai ngesi.

Aso kapaaran adiopet abu totoke kobu emoot nges.

38 Ido apupuni ngesi akokor ngin iworoi kutukut. Atamakini ngesi da nutaman kere ebe kutukut, konye mam nges apedori aswam ngun. Abu ngesi kotamak aruo bala akokor, konye mam nges apedori aswam ngun. Koany, arai ngesi emorukaalet. Ngesi, ageun ber sek da, arai emorukaalet. Ebeunit nges akokor abekun bon.

Eputosi ngin kede itunga ice imeeban luka ekanisa. Kangin...Esubit bala epone ngon nges ejaar; nepetai idiopet bon kama ejai atukos nairukumitai, nges edolit.

Konye apaaran adiopet abu totoke kitor kuju eporitai, kosodi adelor. Abu ngol kojenu ngin. Abu ngin kopupun erai naedolit. Kanukinyo? Arai ngesi emorukaalet, ageun ber sek da.

Epone ngon nges ejaar kede Eijiri, araibonat Akirok, araibonat apedor naka Yesu Kristo. Ne edaunitere ainerun sek etunganan toma Aijar naka Ikaru kere, iirari ngesi adelor ngin nakabeit, adeloret naka Edeke, emamei ibore epedori aigalikin nges kama ejai Ngin.

Epedori aticepak ekanisa atemar ebe, "Atuboros apaarasia nuka nuaumokin," klak, klak, klak. "Kobwo kane kosodi ainyam nu, kosodi aibwo kane ka ainyam da ngun."

Mam iboro ngun luka togo loka akokorei epote aswam kanukeng, bobo. Adau ngesi aekar! "Epedoros iboro kere!" Edakun ngesi kokwap.

Erai kanukangun, ationis kede Ikristayon luipu lolo, mam kes epedoritos adakun akejekec kakwap.

Abu toto namojong kotema ebe, "Okooka, kosomun! Irai jo imorukaalet. Kobia kuju ne neajai eong."

Kotema ngesi atiar, "Toto, mam eong eiritor aisom, kotoma aijaraka."

Abu ngin kotema, "Eebo, kosomun bo ber jo! Irai jo imorukaale, ageun ber sek da. Mam jo irai ikokor." Aso abu ngesi kosomun nasodit kosodi aijangakin abebenokake; mam abu kismama ejok noi, konye abu ngesi kodakun kokwap aporor.

Ngon nges eipone lokismama oni. Icamuni oni Edeke kanuka aiyuun, kanuka Akirot naiwadikatai. Ejai icebore toma nen; erai Aijar ngin naka Ikaru Kere. Inerunitai sek jo alomar toma kangin.

Araasi papaake kede tataake imorukaalei. Arai ngesi emorukalet, apaarasia ngun kere nukokau. Mam emorukalet inyalanakin kede iboro ice. Mam cut nges erai loinyalal; mam. Erai ngesi emorukalet.

39 Kosodi akaulo na ijenunia jo Akirot ngin obe naka Edeke ebe kerai Inyamat luka Emorukalet, kojalakini do jo ibore yenice yi. Kidaun jo ailungulungun toma asima nakajaran naka Edeke. Ibu jo kiira kama ejai eteopani kon. "Arai emunauna iswam yen yenika akwap, kija oni kangin nakiidarit."

Itemari jo ebe, "Ngin erai abeit, Onac Branham?"

Mam ace, kalemutu ber imorukaalei idis kasodete asesen kes kanu idakikan idis. Ajai ekiror, etunganan loanyaritari Musa. Nginitunganan kere ejeni ebe enabi enyaritari emorukalet, kotoma Obaibuli.

Ajai kolo enabi loanyaritari Musa. Ido kadiopepaaran abu Edeke konyaraa nges, ido mam abu kocamak nges alosit adokar toma akwap, ido abu ngesi kotwana kAtiida. Kosodete Imalaikan alemar nges ayangar ainuk.

Ajai bobo etunganan ece, emorukalet, mam abu koyangaik nges atwanare. Abu ngesi kitor aitub Yorodan, kosodi Edeke aijukun amagalit kwap; kosodi elou lo loka akuan adoere kanen, ido abu aikeun kosodi aikamun ainakinet naka ikar kere.

Ikaru akwatakanyikauni ekaulo, ikaru akwatakanyikauni ekaulo, Komoru Lokalaunan, apotu ikiliok luarei ngul kobwaata kanen. Kedaunit akuan naka Musa aibos adaun akwat nuka ikar, konye kane ajai ngol toma aputo kwa kangin kiton ber Petero da, ka Yakobo, ka Yokana apotu kojenata ngesi. Amen! "Arai emunauna iswam yenikakwap yen," Ajaasi kesi nen, ebwoete Komoru Lokalaunan, kotoma awatekek nuitubusikinitai. Naarai, araasi kesi inabin luabu Akirot kobu mamakec.

40 Bobo da kaanyutu ber oni enabi ece, apak adiopet, lokenyaritari ekekiror Samuel. Arai ngesi etunganan loapol noi. Adaunit ngesi aisisianakin Isirael; abu kolimokinite kes ebe mam ebusakinit kes ajaun kede ekabaka. Abu ngesi kotema, "Eong alimokinitor yesi ibore idiopet da Kokiror loka Ejakait yenimam abu kitodolikin?"

Kotemasi kesi atiar, "Mam. Kanginibore kere yeniduc kilimonok ijo isio Kokiror loka Ejakait abu kitodolikin."

Arai ngesi enabi ido abu ngesi kotwana.

Nepetai akaulo naka ikar iuni arai iwongon, abu ekabaka odolok toma ationis; kerai ngin ber eringa kebukoro Aokot nuka Yesu Kristo. Ajai Ngesi toma paradais. Kosodi akacudan nako Endor anyaraun kanuka icetunganan abunore, kosodi aisinapikin Saul. Ido neawanyunia akacudan nges enyouni aibwo, abu kotema ebe, "aseseni eong edeke enyouni kokwap."

41 Ido akaulo nakedaunia etunganan ngol apak etwanit, konukai, ido kobos kotoma ates, kane abwoi ngesi kotoma abwa ngin, konapite inapeneke luka enabi; ido aringa arai enabi, amen, naarai abu ngesi kotema ebe, "Kanukinyo kinyaraunia eong kotoma aiyengunika, aanyu kwape kiraunor ijo lokasurup loka Edeke?" Kosesen nges edwari. "Akuare naka moi, kosawa kalo, ibuni jo ajaun nepepe keong." Aringa ngesi erai enabi, karaida abu ngesi konyounite kotoma akuanike.

Koany, adaunit ngesi araun ne, ido kerai atutubet naka Akirot kangin, ido abu ngesi koloma anyoun kaijar naka akuan abongor toma akuan ngin naetemonokinitai kanukeng eringa apetetait naka akwap. Abu ngesi koloma toma akuan ngin naka teopani, na da kerai Akirot ngin. Idumutu yesi ngin? Nen nges elosete ikeyuunak kere nakibelokinor oni kane.

Konyet do, kotoma aputo kangin, ikeunio do aigalisit. Koany jo, irai jo Akirot ngin, ijo da, neilomaria ijo toma nen. Kwape imukeru yenididi; kwape abu eong kalimunitor apak edit kokau...

Kwana koany. Kituritete Edeke kanuka Aipuceta kanu nuejaasi apukonor, ngin nges ailipaka kanu aijen iboro lu!

42 Kwana apukokinio nakabeit naka Melukisadek iparun kwana atakanun. Inyobo? Kerai Ngesi Edeke, Akirot, eringa Ngesi kerauna akuan; Edeke; Akirot. Naarai, kiburai Nges araut; emamei bobo ice yen apedori araut yenimam etwani bala Ngesi. Koany, ajaatar eong kapapa kede toto; kijaatar ijo, da. Yesu ajaatar kapapa kede toto. "Konye Etunganan lo amameotor kede papa, araibonat toto." Yesu ajaatar kede apak naabu Ngesi kogeunia; Etunganan lo amameotor. Abu Yesu koinak aijaraKe; Etunganan lo mam

apedori aswam ngun, naarai arai Ngesi Aijar. Ido kerai Etunganan elopet-ngopengol apak kere. Amuno eong ebe epukokini yes Edeke ngun. Etunganan elopet-ngopengol, apak kere.

Koany ber jo emaeteKe, "Ekabaka loka adolit." Kwana, Iburanian 7:2, "Ekabaka loka adolit, kede Ekabaka loka ainapakin." Erai Ngesi ikabakan iarei. Kwana kosesen, Iburanian 7:2, "Ekabaka loka adolit, bobo da Ekabaka loka ainapakin." Erai Ngesi ikabakan iarei kanen. Kwana ageun nabunio Ngesi kotoma akuan kosodi aijaun akuaniKe kuju, kotoma Apukokinio 21:16, enyaritai Nges, "Ekabaka loka ikabakan." Erai Ngesi kes iuni kere, nepepe. Koany, Edeke Ekabaka, Teopani Ekabaka, Yesu Ekabaka. "Erai Ngesi Ekabaka loka ikabakan."

Erai ngin nairiamara kere, cut bala etau, akuan, ka emoyo, epote kere aiswamaun idiopet.

Bobo da, erai Ngesi Papa, lo da arai losodit; Okoku; ka Emoyo Lokalaunan, Emoyo.

Ekabaka loka adolit," ewai loejenere Emoyo; teopani; "Ekabaka loka-loka ainapakin," ido toma akuan arai Ngesi Ekabaka loka ikabakan," Etunganan ediopet ngopengon.

43 Neabu teopani, abu Musa koany Nges, Anyoun 33:2, arai Ngesi teopani. Akoto Musa aanyun Edeke. Adaunit ngesi aiirar eporotoKe, abu kiirarite Nges inera mamake, abu koany Nges kokitui kanen, kwape Epir loka Akim loepol. Kosodi Ngesi atemar ebe, "Ingaibo Jo? Akoot eong ajenun Ingaibo Jo." Abu Musa kotema ebe, "Alosi eong aibwaikin..." "Arai icamak Ijo eong aanyun Jo, akoto eong aanyun ereeteKon."

Kotemari Ngesi ebe, "Emamei etunganan epedori aanyun ereeteKa." Kotema Ngesi atiar, "Ebwaikini eong akaniKa akonyenekon, kasodi Eong atubor. Ido ipedori jo aanyun epuraka, konye mere ereeteKa." Itei jo? Ido naatuboror Ngesi, arai epura loka Etunganan; arai teopani. Kobuni do Akirot mama ejai Musa ebe, "AJAI," kerai Akirot nges ngin. Abu Akirot kobu mama ajai Musa kotoma aputo naka Epir loka Akim kotoma okiot loanoki, l"AJAI," ngol

Kwape Akirot naka osomero loka ediini, kama ejai teopani, arai ti gwai. Kitimoto eong. Abu Ngesi kobu neejai Aburaam kwape Etunganan, kokwap naka ekitoi loka eloa. Kwana kosesen ber jo nen. Abu Etunganan kobu neejai Aburaam, kes iuni, kosodete aiboikin kwap naka ekitoi lo eloa, iuni kakesi. Ido koany, akaulo na Nges einer kede Aburaam..

44 Kanukinyo abunio Ngesi? Aburaam, kwape araar ngesi loajaatar kaisumunet ka aisiiraret da naka okoku loabunit, ido bobo da arai ngesi enabi loka Akirot naka Edeke lo da amunokina Akirot naka Edeke, kimarakinite imodiobore yen etepegit ngin kwape yenemamei. Koany eipone loeraar Akirot naitekooro? Abu Akirot kobu mama ejai enabi. Itei jo, arai Edeke ngol koteopani. Ido ebala Ebaibuli ebe, "Ebuni Akirot mama ejai enabi." Ido kerai Akirot na kane a-a Akirot kotoma teopani.

Kwana itemari jo ebe, "Ngon kerai kereka Edeke?"

Abala Aburaam ebe arai. Abu ngesi kolim ekiroriKe, kerai, abu ngesi konyarai Ngol ebe Elohim. Kwana, kotoma ageun 1, idumuni jo ebe, "Kageunet abu *Elohim* kosub akuj ka akwap." Kotoma Ageun 18, idumuni oni ebe-ebe abu Aburaam konyara Etunganan lo loabu kiboikin nen kosodi einer ka nges, ido apedori alimokin nges nukaiyeiyea nukotauke, alimokin nges ngun nuajai Sara awomoom kokauKe, abu Aburaam kotema ebe, , "Erai Elohim." Ajai Ngesi toma aputo naka teopani. Idumutu yesi ngin? Koany ekaulo..

45 Kwana ijenuni do oni ebe kotoma apak kangin ajai Ngesi toma aputo naka teopani. Abu ngesi konyara Nges ebe, "Ejakait Edeke, Elohim." Kwana, kotoma Ageun 18, idumuni oni ebe erai ngin naabeit.

Kwana, koany, Aburaam. Ajaasi iuni kakesi nepepe, konye ne eriamunotor Aburaam nepepe ka kes iuni kere nepepe, abu ngesi kotema ebe, "Ejakaitika."

Konye neabu Lot, kokwap kangina ko Sodom; iarei kakesi apotu kijesaros kwap ngina, kosodi Lot aanyun kes iarei eponitos, kosodi ngesi atemar ebe, "Ikajaka." Inyobo ationis? Aiboisit nasodit, mam Lot arai enabi, erai ngin abeit, araibonat ido da mam nges arai ekiyakia loka apak, aso amameotor ngesi kede apukokinio naka lokerai Ngol. Erai ngin abeit cut. Apedori Lot anyara kes "ijaka." Luipu kakesi, apedori ngesi asalit enyarit ebe "ijaka."

Konye mam ace arai idiibo abu Aburaam koanyunite, aringa erai Ejakait ediopet. Ngon nges Edeke. Kera lo nges Melukisadek.

Koany, akaulo na adaunor ejie, abu Melukisadek kijaik ikokuke yen kaipikor aimor komesa; inoma ber jo ngin, atutubet naka akuanaKe! Kwana ikoto oni aanyun kane. Kotoma aitupuset kane erai, kotoma asesen, aimor komesa. Akaulo naka ejie, abu Ngesi kijaikin Elopel, naarai aimor komesa erai atutubet naka Kristo. Ido akaulo naedaunor autara, akaulo na idauna jo aipikor nacut, kanen nges do imoria jo akuan naka Kristo, araun atutubet naka Etunganan kalo. Idumu jo ngin?

46 Abu Yakob kouta akuare kia, ido mam abu kojalak Ngol aitodol Ngol aisirereng ngesi. Erai ngin naabeit. Abu koji kanuka Aijar! Akaulo na edaunor ejie, koinakini do jo Edeke nuKeng Elopel. Ngin nges

aimoroKe komesa nakabeit. Imugati yenididi kede ostia eraas bon luebwoikinitos Ngin. Mam ibusakinit jo ainyam ngun arai mam jo ijiit ber kosodi araun atutubet naka Edeke.

Kiitu ebe, "kotoma apak kana, mam ber aimor komesa arai naecorakinitai, mam kiton eringa atwanare naka Kristo, akwat ka akwat ka akwat nuka ikaru konyet ekaulo.

Konye Melukisadek, akaulo naka ikokuKe Aburaam adumun aipikor, abu Melukisadek kiriamunos nepepe ka nges kosodi ainakin nges ebino ka emugati; aitodiar ebe akaulo na edaunor autara naka akwap na, ibuni oni airiamun nepepe ka Nges toma Akuj kasodete aimor komesa bobo. Ebuni ngin araun Epucit loka Edukone. "Mam bobo Eong abuni aimat araito naka amusabibu, araibonat ainyam araito, kiton neamasia Eong ka ainyam nepepe ka yes, apak bobo ace, kotoma Ajakanut naka PapaKa." Ngin erai naabeit?

47 Koany bobo, abu Melukisadek kolot airiamun ka Aburaam eringa nges kedolo ore. Aitupuset bo nanyoin naibus biai na kijaar oni kane! Melukisadek iriamunos kAburaam eringa ngol kedolo ore, akaulo naka ejie.

Kiriamun oni ka Yesu toma apak, eringa oni kedolo Ore. Erai ngin abeit. Isesolonikan Lokiyareit nges elimokinit oni ngun, naarai, "iriamun oni kede Ngesi toma apak." Aitupuset naibus naka Rebeka iriamunos ka Isaak, komanikor, apak nakatibong. "Iriamun oni ka Ngesi toma apak." Isesolonikan Loiyareit nges elimokinit oni kwangin. "Oni lukijari ido kasalitos, mam kisimiki arai aitikokin ngul luejotoete; naarai eruikini arupepe naka Edeke; elingete ngul luketwakito kotoma Kristo ajarun; kosodi oni lukijari ido kasalitos kikamario do oni nepepe ka kes kuju apak, airiamun nepepe kEjakait toma apak." Itekooro, aitupuseta nu kere.

Kanukangun, eteopani, arai itwanit jo kosodi alomar toma oteopani ngol, (nunyoika etakanunete?) ebuni eteopani toma akwap kanu alemun akuan ngin naelakunitai. Ido arai ijai jo ne toma apak, iyangari jo akuan kanu airiamun kede teopani, aso bodo jo, "kikamarete oni ayangar kuju apak, kosodete alosit airiamun kEjakait toma apak."

Ingaibo Melukisadek lo kilema Edeke!

48 Kwana kianyuni oni kane kidelele aiyeyea kaileleba naka aijarawok kotoma alosit, ka atwanare, ka nekilosoni akaulo nakitwakia oni. Bobo da, ainerun nasek erai ibore yen idelele kane. Kwana kopupokisi kwape kisisianakinia oni nu, ejok.

Adoketa nuka-nuka alosikineteKe naka Ikaru kere najaatar Ngesi kotoma aiyeyeaKe kwana do adaun apukor. Koany, eringa adoketa auni ejaasi kanuka alomar toma aisetekorioro. Esubit kwa elakunia Ngesi akwapin, epone ngopengon nges elakunia Ngesi EkanisaKe, elakuni Ngesi itunga, kotoma adoketa auni. Kwana koany. Nasodit erai aitojokio, kwape abu Luther kolimonokinitor; naiyareikini nges, aitalaunio, kwape abu Wesley kolimonokinitor; nakiuniet erai, aibatisao naka Emoyo Lokalaunan. Erai ngin abeit. Kobuni do Awuruporio!

Kwana, akwap, epone ali abu Ngesi kolakunia akwap? Nasodit, nuabu Ngesi kiswama, naadiakaria akwap, abu Ngesi kilota ngin kotoma aibatisao naka akipi. Erai ngin naabeit. Kosodi Ngesi aitakin AokotoKe toma kangin, komusalaba, kosodi aitalaun ngin ka konyara da ngin naKeng Obe. Kosodi do konyet nunyoika iswamai Ngesi? Kwape abu Ngesi korwetunia akwapin kere kama ijai jo, kosodi aisiteteun nginibore kere kanuka aibatisao naka Akim naka Emoyo Lokalaunan, ebuni bobo Ngesi aisiteteun akwap. Ido eponio aicwear ngin kere kede Akim, kosodete alear nginikurut kere, imilionin luka amairon kuju, nginibore kere elemario awai. Kosodi konyet do ejai Akuj Nakitetet ka Akwap Nakitetet, cut kwape iraar jo isubat yanitetet kotoma Kristo Yesu naetingia jo Emoyo Lokalaunan. Koany, aso konye jo. Ibore ngin kere erai cut kwape yenilererei kwape epedoria ailerer araut. Nginibore kere ejai toma ouni.

49 Aurio naka akuan ejai kotoma iuni. Inyobo ibore yenisodit yen iswamaikin aberu naejai aidoun? Inyobo egei abulun ber? Akipi. Inyobo etupakini abulun? Aokot. Inyobo ibore yen etupakini? Aijar. Akipi, aokot, emoyo.

Inyobo iswamaikin irasit? Ebosi. Inyobo ibore yenisodit? Atorom. Inyobo etupakini? Akou. Inyobo etupakini? Agugu. Kolomuni do konyet icokat kotoma kanen. Bon adoketa ngun auni nuka ngin, kiton ne edolokinio araun icokat. Erai ngin cut becebec.

Itigogongi Edeke ngun. Erai duc ngin nakerai naedolit. Itigogongi Edeke ngin araut naabeit. Aitodiar kidelelei, ngul lukinerunitai sek kes bon epodokinitai kotoma alakunio. Ijo ibu kodum ngin? Akoto eong ainyogoikin alimun ngin bobo. Itunga lukinerunitai sek kes bon epodokinitai elakunio. Epedorete aticepak itunga kituputoro, aomit bala elakunitai kes, konye alakunio alopet nges naka ngul lukinerunitai sek. Kanu naarai, akirot ngipengin obe *alakun* apolouke ebe "ainyakun toma aiboisitike." Ngin erai abeit? *Alakun* erai icebore...Kanu *alakun* idiobore, erai, "ainyakun ibore ngin toma aiboisit naajai sek ngesi toma." Aleluya! Aso erai bon lukinerunitai sek kes inyakunio, naarai luce kwi mam aponitosi Kangina. Koany, "ainyakun!"

50 Araut yen Ikaru kere nepepe ka Nges, kageunet...Aijar naka Ikar kere nakijaatar jo, aomisioitiKe naka

nukirai jo, bon, akoto Ngesi jo ti...Akoto Ngesi eong aibwo kotut, atemasi. Akoto Ngesi ijo aiboi koicolong lolo. Apolouke kijai do oni aitodolikin alosikineteKe Naeperonori. Ido ngin yen abu konyou kore, ebunit bon toma akwap kanu aijaanakin alosikineteKe. Ngin erai abeit? Mam ace. Apolouke do, akaulo ne edaunor, inyakunio do kotoma ojautene loitubusikinitai; itiotionio kosodete ainyakun bobo.

Mam erai aumokinet ebe abu Paul kopedo alimun ebe, neajakare adukun aiboisit na abeitor ajepar akouke; abu ngesi kotema ebe, "Wu, atwanare aibo ejai ekonitidot? Wu ates aibo ejai akoniipikor? Konye emalai eong Edeke loeinakini oni aipikor!" abu nges kotema ebe, "Atwanare, kolimokinai eong aibo ipedoria jo ainakin eong acelaar! Ates, kolimok eong epone loilosio jo aiwen eong! Naarai arai eong ekerumunan loka Aijar naka Ikaru kere." Amen! Abu ngesi kojenu ngun. Atwanare, okatwak, ates, amamei ibore apedori aiwen ngesi. Ido emamei ibore epedori aimusung oni, kijaar ka Aijar naka Ikaru kere! Abu ngesi kojenu ebe kerai ngesi loesirerengitai kede kAijar naka Ikaru kere.

51 Esubit bala alunguret naka akopio. Arai amisiikinit eong, erai ngin...mam eong ajeni nuipu nuikamunitos ainyalio naka kee. Konye, konye iburai korai ebe kerai ngesi ailungurikin naka aiinate araibo nat apalalu naka ekwam. Ido ne elilimioror akuare kosodi amutonor, itipitipete akipi ngun kokuju kosodete adoenen kwap. Ecakuna ngun kanenice. Konye atupuruc naetupakini eringa akolong kelomunia, eperi ngin kanen, ikesa yenididi ngin komarani. Konye kinye ber akolong kikeun kuju, koany ngin egeuni amwekimwek. Iyalama ngesi. Kanukinyo? Elosi akolong anyaraar nges abongor cut ngipengina neabunio ngesi.

Ido ikoni nen kede Ekristayot. Aleluya! Kijeni oni ebe neilosio oni toma Akonyen nuka Edeke, ejai icebore kotomawok yen elimokinit oni ebe kibunit oni kanenice, ido kijai oni abongor bobo kanuka Apedor kangin nairiit oni.

Iitunet yenedit ngin yenedit yenika akopio, emwekimweki ngesi ido kocai ka ataan, naarai ejeni ngesi ebe ebunit ngesi kokuju kangina, ido ejeni ngesi ebe elosi akolong ngin ainyakar nges kuju ngina bobo.

Ido etunganan loerai aitodiaret mutan naka Edeke, ejeni ebe, aleluya, neabu ngesi kiriamunotor kede Okoku loka Edeke, eponio nges ainyakar kuju ngina anyoun kane apak ace. "Naarai arai ikeun Eong kotoma akwap, esukunyuni Eong da itunga kere mama ajai Eong." Amen!

52 Kwana koany, kwana, kianyu oni Melukisadek ido kanukinyo mam Mariam that araar totoKe. Kanuka ngun nges ainakini Nges enyarai nges "aberu," mere *toto*. Amameotor Ngesi ka papa," naarai arai Ngesi Papa, Papa lomam edaun, iuni kotoma Odiopet. "Amameotor Ngesi ka toto," teni bo cut mam. amameotor Ngesi ka papa, naarai arai Ngesi nges Papa. Kwape abu ekewadikan ainerasia kotemaria kapak adiopet, inera nuepolok nuka aiturite Yesu, abu kotema:

AJAI loabu kinerakinos kede Musa kotoma akim nakokiot loanoki

AJAI Edeke loka Aburaam, Aicerit Nailiyai Nakatupuruc.

AJAI Alupa, Omega, Ageunet kama ejai Esange.

AJAI loerai esube kere, ido Yesu nges Ekiror. (Erai ngin naabeit.)

Oo, ingaibo ibakasi yesi ebe arai Eong, ido aibo ebakasi kesi ebe abunitor Eong,

Yesi ijenete PapaKa, araibonat yesi ipedorete alimokin Eong EkiroriKe? (Haleluya!)

Ngol nges Ekiror loka Papa! Eebo, "Abunit Eong Kokiror loka PapaKa, ido mam yes ijaunete Eong." Itei jo? Naabeit, erai Nges ngopengol bian, lolo, ka ikaru kere.

53 Kosodi Melukisadek lo ainap akuan. Abu Ngesi kopukor Elopel kwape Okoku loka etunganan neabunio Ngesi, kwape Enabi. Abu Ngesi kobu kotoma Okiroria iuni luka Okoku; Okoku loka etunganan, Okoku loka Edeke, Okoku loka Daudi.

Neajaar Ngesi ne toma akwap, arai Ngesi Etunganan, kanu aitodolikin Nuiwadikatai. Abu Musa kotema ebe, "Ebuni Ejakait Ekusideke aitonyoun enabi loeputosi keong." Aso ajai Nges abunore kwape Enabi. Mam Nges abu, mam elimunitor ebe, "Arai Eong Okoku loka Edeke." abala Ngesi, "Arai Eong Okoku loka etunganan. Iyuunit jo Okoku loka etunganan?" Naarai, ngun kes nuajai Ngesi aitijenar nukec, naarai ngun kes nuarai Ngesi.

Kwana abu bobo Ngesi kotoma Okiror ece loka Okoku, Okoku loka Edeke; lomam eanyunio, Emoyo.

Ido ne ebunio Ngesi bobo, erai Ngesi Okoku loka Daudi, aiboikin OicolongoKe.

54 Kwana neajaar Ngesi ne kosodi araun akuan, aponi konyarai Nges, "Okoku loka etunganan." Kwana, eipone ali abu Ngesi kitijenunor mama ejaas akwapin kwape Okoku loka etunganan, Enabi?

Apaaran adiopet ajai eong einer nuikamunitos Petero ka Anderea, onaceke. Araasi kesi ikalokak

lukecor, ido papakec Yona arai ekeyuunan lomojong loapol noi. Apaaran adiopet ebakai ebe abu ngesi kiboikin esiep loka ataker. Abu ngesi kotema ebe, "Odwe, ijenete yesi epone lokipou oni kelipiata neikototor yesi lukecor." Araasi kesi ikalokak luagwelanarete lukecor. Abu ngesi kotema ebe, "Imunokin oni Edeke, Yawe, kanu ejare wok. Ido ajai kwana eong amojong; mam bobo eong apedori adaun apak naeoj eboete ka yes isap. Ido idila duc eong, kwape kikeyuunak kere lukabeit, edar eong apak naebunio Mesia ngon. Ijaununor oni kede iponesio kere luka lukaingal, konye abunit lokabeit Ediopet, kapaaran ace mutan." Ido kobala ngesi, "Neebunio Mesia, mam eong akoto yes itelepai aitapaario. Mam Mesia eraun ekesisian loka ediini. Ebuni Ngesi araut Enabi, naarai enabiwok Musa, lo da kitupit oni, abala ngol."

Kwana, Eyudayat edio kere iyuuni enabike. Isisianakinitai nges aijen ngun. Ido arai kelimu enabi idiobore kere yen erai kwangin, apolouke erai ngin abeit. Konye abala Edeke, "Arai ejaun idiopet akidingosikus, yenikemoyo, araibonat enabi, Eong Ejakait abuni aitijenikin mama ejai ngesi. Ido arai kitodolikinon ngun nuelimuni ngesi, kanukangun kiirasi nges ido koyongata nges; konye arai mam, mam ijaikinete nges ayongio nepecep da." Ianyu? Kwangin do ngin nges aitigogongio naka enabi kwape lokabeit.

55 "Kwangin do arai Musa enabi loetigogongitai kwape lokabeit, ido abu ngesi kotema, 'Ebuni Ejakait Ekusideke aitonyoun kokidingikus, koinacanakus, Enabi loeputosi keong. Ido kere lumam elosete aiirar Nges etiakario kotunga.'" Abu ngesi kotema, "Kwana, idwe, kiitutu, ebe, kwape Iburanian, kiyuunit oni inabin luitigogongit Edeke kwape lukabeit."

Kwana kopupokisi ejok. Siri kitwakiasi ngin. Kotema da ngesi atiar, "Naebunio Mesia, ijenunete yesi Nges, naarai eraun Ngesi Mesia-Lonabi. Kwana, ebalasi kesi ebe adaunos kwana ikaru akwataongon. Mam oni kijaunar ka enabi ageun kolo enabi Malaki, konye ebuni Ngesi ajaun!"

Apaaran adiopet, akaulo na atwanareke, ikaru idis, ajai okokuke Anderea esakasakat kariri naka ecor. Kosodi ngesi aiirar etunganan lokekitui lokelomuni kotoma amoding ebala ebe, "Ejai Mesia ebwoi kokidingikus kwana!" Abu Emorukalet lopeti ngol loabu kikeun kamoding kosodi aporun nen kotema ebe, "Ejai Mesia kidingikus kopekwana. Mam ber oni kijeni Nges, konye ebwoi Ngesi kokidingikus. Abuni eong ajenun Nges, naarai aanyuni eong aanyunet ebuni kotoma Akuj."

Apaaran adiopet abu ngesi kotema ebe, "Engol kanen, koanyutu, Imerekek yenika Edeke yen elemanari arokisio nuka akwapin!"

Konyouni awai e...kolosi etunganan lo, amoun onaceke. Kotema ngesi atiar, "Simon, akoto eong jo abunore lailo ne; kidau oni adumun Mesia."

"Oo, kolot ngaren, Anderea! Ijeni jo nuejokak aitelekar nen!"

"Oo, ajeni eong. Konye, ebe, itegelikina Etunganan lo."

"Aibo ejai Ngesi? Aibo ebunitor Ngesi?"

"Yesu loko Nasaret."

"Ibuga yenididi, yenaronon ngin? Kanukinyo, mam Nges apedori alomun kotoma aiboisit naronon, naemodok kwa kangin."

"Obia bon jo kosodi aanyun."

Kawasia abu kilip Nges ajesar kwap apaaran adiopet. Aso neadolunio ngesi ngaren naka Mesia, Yesu ebwoi kanen, kinerasi kede itunga. Ne adolio ngesi ngareniKe, abu Ngesi kotema ebe, "Ekirorikon erai Simion, ido irai jo okoku loka Yona." Abu ngin kiswama ngun. Abu ngesi kodum ilaceta luka Akabakanut. Kanukinyo? Ajeni ngesi ebe mama Etunganan ngon ajeni nges. Ido epone ali ajenunia Ngon nges, ido papa ngol loayongit Edeke abu kisisianakinite nges aiyuun Mesia?

56 Ajai etunganan loabwoi kanen, lokenyaritai Pilip. Oo, abu ngol korieng neteni! Ajeni ngesi etunganan ece, lo lem esisiata ngesi Ebaibuli. Konyouni ngesi alosit awai, arimor juwai naka erongat, kosodi adumakin nges nen manake naka iseitunin naacapitai. Ajai ngesi ekuko, euta ailip. Esisiatos kesi Ebaibuli irwan nuipe nepepe, aso abu ngesi kobu kinga nen. Ido alimunit ngesi, akaulo na adaunia ngesi ailip, abu ngesi kotema, "Obia, koany Lokidumu oni; Yesu loko Nasaret, okoku loka Yosepu. Ngesi nges Mesaia lokimoot oni."

Kwana apupi eong Natanel ebala ebe, "Kwana, Pilip, mam jo iloma toma apaar naidul, ijo biai?"

Oo, mam. Mam. Kwana akoto eong alimokin jo. Ijeni jo, ijai lem oni isisai Ebaibuli nepepe, ido nunyoika abala enabi ebe alosi Mesia araut?"

"Abeit Nges araut Enabi."

"Iitunit jo ekalokan lukecor lomojong ngol loibu jo kogwel agaria kamake, lomam asiomit adoketait na

apedor aiwadik ekirorike da, loanyaritari Simon?"

"Eebo. Uh-huh."

"Abu kobu. Ido ijani jo? Abu Yesu Lo loko Nasaret kolimok nges ebe arai ekirorike Simon, abu kijulak ekirorike araun Petero, ido lo da erai 'itiida yenididi' kosodi alimokin nges ekiror loka papake."

"Eebo," abala ngesi-abala ngesi, "Mam eong ajeni. Epedori tope imodiobore yen ejok alomun ko Nasaret?"

Abu ngesi kotema ebe, "Mam eong akoto oni einer nuikamunitos ngun; kobia abunore kosodi aanyun." Erai ngin awomisiot naejok, "Obia koany."

Aso kobuni do Pilip, ayangaun Natanael, ido neabunia ngesi elosi, ajai Yesu ebwoi, kinera, aticepak ajai ailipanakin lukadekak kotoma okokoro loka ailip. Ido neadolunio ngesi neajai Yesu, kosodi Yesu angolekin mama ajai ngesi, kotema da atiar, "Koany Loko Isirael loemamei aitoronet."

57 Kwana, itemari jo, "Eebo, arai ngon epone loanapitor ngesi." Oo, mam. Itunga luko Kide kere enapete epone ediopet. Aticepak arai ngesi loko Syria, araibonat imodiobore kere; amasurubun, inapen.

Abu Ngesi kotema ebe, "Koany loko Isirael loemamei aitoronet," kakiro ace, "etunganan loipiororoi loemamei aingal kamake."

Eebo, abu ngin kosub bala ituwori Natanael. Kosodi ngesi atemar ebe, "Rabi," na da erai apolouke ebe, "ekesisianakinan." Rabi, iworibo kijenunia Ijo eong? Kijenuni Jo biai ebe arai eong Eyudayat? Kijenuni Jo biai ebe arai eong etunganan loemamei aingal kotoma, komamei aitoronet?"

Abu ngesi kotema ebe, "Eringa Pilip kenyauna jo, neijaar jo kwap naka ekitoi, abu Eong kaanyu jo." Uh! Amairon atomonakany awai, juwai laiye naka akwap, apaaran adiopet kau.

Inyobo abu ngesi kolim? "Rabi, ijo irai Okoku loka Edeke. Irai jo Ekabaka loka Isirael!"

58 Konye ajaasi isasedotin ngul ebwoete kanen, luajaasi kanukec bon, kimakakina kanukec, ebakasi ebe, "Erai Etunganan lo Belesebul, loinera akiro nukoingaren."

Kobongok Yesu ebe, "Etimi Eong yes kanuka ngun."

Kwana kiitutu ebe, mam kes apotu ikenyutu ngun aikenyun, konye elimunitos kesi ngun kotoma otauonocek. "Kosodi Ngesi amisiikin awomisiokec." Erai ngin abeit. Ngun kes nuebala Ebaibuli. Konyaraata ngin *aisiomunun aomisio* arai ikotosi yesi, konye abu Ngesi-Ngesi kojenu aomisiokec.

Kosodi Ngesi atemar ebe, "Etimi Eong yes kanuka ngun. Konye apaaran ace ebeit Emoyo Lokalaunan abunore kosodi aswam ibore ngipengin," akaulo na anyounike; "arai kiner jo akirot adiopet asurokin Nges, mam kitimio jo kotoma akwap kana kiton akwap naebunit da." Ngin erai abeit? [Kotemari atukos ebe, "Amen." Ekewa] kwana, arai Iyudayan kes ngul.

Kosodi apaaran adiopet abu Ngesi kojaikin kede eipud alosit Samaria.

Konye nepe eringa sionio kiswama ngun, kipou oni kadumutu aberu, araibo nat a...

59 Etunganan je, kwape ajaar ngesi alosit aitor toma orute loenyaritari Lokajokan, ebe aponi kitangaleunoi nges.

Kosodi Yesu ajenun ejauteneke, kosodi alimokin nges ebe, "Kolem akapetekon kolot ore." Kosodi ngesi aswam ngun, kosodi angaleun.

Kanen isisiauni do oni ebe, Iyudayan, ice kakesi apotu kijautu Nges. Ice apotu kiyuutu ngun; ice mam. Kanukinyo mam kes apotu kiyuuniata ngun? Mam kes enerunitai sek kanu adumun Ajar. Mam kes araasi atutubet naka aomisiot kangin.

Kwana kiitu ebe, araasi ngul isasedotin ka itunga lukapolok. Ido Yesu...Koomoom ber jo nuka ikesisiak luka ediini ngul ka isasedotin, itunga lumam jo ipedori adumun aitoronet kotoma ajarakec. Kotema Yesu atiar, "Iraasi yesi luka papakus ajokit, ido iswamaete yesi aswamisioke." Kobala ebe, "Karai yesi koraasi luka Edeke, ti yes kiyuutu Eong. Arai mam yes ipedorete aiyuun Eong, kiyuutu bodo Eong kanu aswamisiio nueswamai eong; itijenaritos ngun Eong."

Kwana, abala Ebaibuli ebe, "Yesu ngopengol bian, lolo, ka ikaru kere." abu Yesu kotema ebe, "Aswamisiio nueswamai Eong nges iswamai ngipengin da yen iyuuni Eong." Ngin erai abeit? Koany, arai Ngol Melukisadek elopet kwana.

60 Kwana koany, bobo, ajaasi atekerin auni bon nuka itunga.

Ipupunenete yesi eong abala ebe arai eong loegangit atiakaku. Arai eong. Ikristayon kere eraasi luetiakara; mere atiakara kanu eriagi loka emukule, konye atiakara nakomoyo. Eriagi loka emukule loetunganan emamei ibore aiswamanara kede nges. Erai ngesi ikoku yen Edeke kotoma Aurio. Konye Ekristayot, abala Edeke, "Kotiakasi Eong!" "Kolomutu kinga kamakec," ka ngun kere. Erai Ngesi loetiakit, nuka amodokok, kiding nukajokak ka nuarokok.

Konye koany, ajai kes atiakit itunga kapaarasia kangun, atiakit kotupitete ateker, na da arai Isamarian.

Ido ejaasi bon atekerin auni nuka itunga toma akwap; arai iyuunit oni Ebaibuli; ngun kes; Kam, Sem, ka itunga luka Yapet. Ngul kes odwe iuni luka Noa. Ilomunit oni kere kanen. Erai ngin abeit. Inyakari ngin oni kere kau mama ejai Adam, na da kitarauni oni kere iinacan. Ebalala Ebaibuli ebe, "Kede Aokot adiopet abu Edeke kosub atekerin kere." Kirai oni kere iinacan, kotoma aleles naka aokot. Epedori etunganan lokirionon akorakin emusugut aokot, ido epedori emusugut da akorakin etunganan lokirionon aokot. Epedori emusugut akorakin etunganan loko Japan aokot, etunganan lodos, araibonat eluga, etunganan lokarengan, araibonat ediotunganan kere, araibonat etunganan loko Japan, arai edio kere, epedori ti ngesi akorakin etunganan ngol aokot naarai oni kere ijai kede aokot nueputosi. Eriagi loka emukule wok, neiboio oni, emamei aiswamanara kede ngun.

Konye neitiakatiakar oni, nges nekilomunia oni kinga kotoma akwapin, bala kwape abu Ngesi kitolomunia Isirael kinga ko Misiri. Nen nges kitiakaror oni awai kama ejaasi iboro luka akwapin.

61 Kwana kerai kesi Kam, Sem, ka itunga luka Yapet. Ido karai oni ajaasi kede apak kanu airereonor ikekia lukaur, ti yes kianyutu Emusugut, neabunitor ngesi. Kwana, arai ngol Eyudayat... Esamariat, lo da arai atutubet Eyudayat kosodi atutubet Emoit, loabu kodukokin nepepe kImo kanuka eiswamae loka Balaam, ka Moab. Araasi kesi Isamarian. Ido ajaasi Iyudayan ka Imo.

Kwana, oni Imusugun amamei aiswamanara kede imodiobore kotoma kangin. Mam oni iyuunit Mesia edio kere, karaida imodiobore. Mam oni idarit edio kere. Aponi do kitolomun oni da toma ekaulo.

Abunit Yesu mama ajaasi luKeng obe, ido mam kes apotu kijautu Nges. Kosodi Ngesi atemar mama ejaas esisiakake ebe. "Siri kilomasi toma aitor orot loka Imo, konye koloto mama ejaas amerekekin nueolioritos nuka Isirael." Ido abu bon Ngesi kolot mama ejaas amerekekin nuko Isirael. Ido koany, abu Ngesi kitodiar kwape Okoku loka etunganan, akonyen nuka Iyudayan. Apotu kesi kongeroto Ngun.

Kwana, Esamariat, araut atutubet Etudayat ka Emoit, eyuunitos kesi da, ido ajaasi idaritos Mesia.

Mam oni kijai idarit. Kirai oni ikapirin, kede iboro inomitai opurianawok, kamaete aputosia; Imo.

62 Konye kwana apaaran adiopet, Yokana Lokalaunan 4, abu Ngesi eipud kojaun aitor Samaria, korotoKe elosi Yeriko. Konye abu kitor adokar airirior ko Samaria. Ido kwape ajaar Ngesi alosit ngina, abu Ngesi kiboikin osiep naka atan nakejai kinga naka etaun lokenyaritai Sukar. Ido atan, arai iiritor ijo ajaun ngina, erai naipasaara nepetai bala na kane. Ido ejai atan naitosomaete itunga kere nen, naka akipi, neeponenenete kesi kere. Ido epote angor tupuruc, adumun amotikec nuka akipi, kosodete ateikin aibwok akwesikec, ido kokoditos kanginikan adiopet, kosodete alosit kangin kidererete cut kwape epedoriata, mam karaida adis ailapar; kinerasi nginidiopet kanginice. Kwangin, apote kesi, apote itunga alomun kinga kanen.

Aso arai nepetai isawan ikany paaran. Aso abu Ngesi kijuka ikiesisiakake oibuga, kanu agwel iboro ice, inyamat. Ido nape emamete kesi...

63 Ajai aberu na arono erwom, ti oni kinyara nges, lolo, ebe, aberu naka aica naereng, araibonat amalayat. Ajaatar ngin kede ikiliok luepu noi. Aso kwape ajaar Yesu iboie kanen, kobuni aberu na nepetai isawan ikany. Itei jo, mam ngin apedori abunore nepepe ka abekon neeponiata ngun awomun akipipec nukiloset; ajai ngin aidar kiton ngun kere...Mam kes enyalinyalasi kwa inyalinyalatar kwana. Amacaritai ngin. Aso do, abu ngin kolomu kinga kanu aokun akipi adis, aso abu ngin kolek aokiet namojong ngin kosodi akodakin igolon abaket, kosodi ageun aijululuor kwap.

Kosodi ngesi aiirar icetunganan ebala ebe, "Aberu, ae akipi amat." Kwana, kiitu ebe, erai lo Melukisadek. Yesu nges lo, bian, Okoku loka etunganan.

Kosodi ngin angolengole kanen, koany da Eyudayat. Aso abu do ngesi kotema ebe, "Ipa, mam erai naisiikinitai Eyudayat aingit Esamariyat imodiobore. Arai eong aberu nako Samaria, aso inherit kere Jo kokinga naka aiboisitiKon. Mam ebusakinit ti Jo aingit eong ibore kwanat kangin kwangin. Emamei oni arucokina idiopet kanginice."

Kotema Ngesi ebe, "Konye korai jo kojoni Loinerasi kajo, ti jo kingit Eong ainakin jo akipi komat."

Kobongok aberu kotema ebe, "Koipone ali ilosio jo aokun akipi? Idul noi atan na, ido emamei Jo ibore yeniwokunet."

Kotema Ngesi atiar, "Akipi nuainakini Eong eraas Akipi nuka Aijar, nuelomete kotoma Aijar naka Ikaru kere."

Abu Ngesi kinerata ka aberu ngin kiton Nges ajenun ejautene loka aberu kangin. Kosodi do erai...koany nuabu Ngesi kiswamaik ngin kwana. "Kolot konyarau okilenikon ido opotu ne."

Ido kotema ngin atiar, "Emamei eong ekiliokit."

Kotema Ngesi ebe, "Iner jo nukabeit, naarai ijaasi lem jo kede ikany, ido loiboete nepepe kajo kwapekwana da mam erai okilenikon. Aso, kotoma kanu, inherit jo nukabeit."

Kosesen ber jo atiaketait naejai kiding aberu ngin kede atukos ngin naka isasedotin. Ajeni ngin nuipu nuikamunitos Edeke adepar epone loajenia atukos naka isasedotin ngin, kere imorikiikinitai nepepe.

64 Kotema ngin atiar, "Ipa, aanyu ebe irai Jo Enabi." Kotema ngin atiar, "Mam sio kijauna kedio adaun kwana ikar akwataongon. Kwana, kijeni isio ebe ebunit Mesaia. Ido naebunio Mesia, ngun kes nuelosi Ngesi aswam." Kerai ngin aanyunet naka Mesia, naarai kerai Ngesi Okoku loka etunganan. Ebala ebe, "Ngun kes nuelosi Ngesi aswam naebunio Ngesi. Iburai Jo korai Ekenabi."

Kotema Ngesi atiar, "Eong nges Ngopengol loinerasi kajo." Amamei bobo imodiotunganan yen tikepedo alimun ngun.

Abu ngin kocakak kwap amot ngin naka akipi kosodi akerit toma ore, kotema da atiar, "Kopotu, koanyutu Etunganan loalimoki eong akiro nueswamat eong. Mam kereka erai Mesaia lopelo?"

Kwana kiitutu ebe, abu Ngesi kisumunite aswam ibore ngipengin kotoma angeset naka ateker naka Imo.

Apotu Iyudayan kojaunotor kikaru ilukimin iwongon luka aidarit Mesia ngol, ikaru ilukumin iwongon luka aisisianakinio ebe abunit Ngesi, ka nualosi da Ngesi aswam naedolunio Ngesi nen, kwabo abu komen kes aanyun Ngol, araibonat abu komen kes ajenun ngun. Ido ne etijenaror Ngesi Elopet koipone lope abala Ebaibuli ebe alosi Ngesi aitijenaror, ne ber araar Nges teopani kosodi konyet araun akuan ido kiboiororoi kamakec, abu komen kes aanyun ngun, kosodete anyara aswamisioKe ebe aswamisio nuka ajokit.

65 Kwana, kijaunor oni kikaru ilukumin iarei luka aisisianakinio, aijesun kwap aitorun mama Okanisa loka Atulik, akaulo naka ikiyakia. Ketorunete oni toma Ekanisa loka Atulik, Oyonanin, ka ice da kwangin, kiton kwap toma atur naka Luther, ka Wesley, inyo bobo, iriongeta akwatakanyikaongon luegelegela abunore kwap. Ajaatar kesi kede aturio nu kere, aisisianakin.

Kwana abu Ngesi kisumun, nape eringa awasia kebuno, ebe aputo naka Sodom ka Gomora alosi bobo, "Kwape kejaatar kapaarasia nuka Sodom, kwape kwangin ejauniata kotoma abunore naka apak nakawasia, ebuni Okoku loka etunganan apukor Elopet bobo." [Aiboisit naeorori kotoma ateepu-Ekewa.]

"Apak edit, mam kaanyunete bobo akwapin; konye yes ianyunete Eong, naarai abuni Eong," inera ngin nuka itunganan ngin kilopet, "Abuni Eong ajaun ka yes, tomakus da, kiton angeset naka akwap, angetakinete naka akwapin. Ajaunos Eong kayes." Erai Ngesi ngopengol bian, lolo, ka ikaru kere. Ianyutu yesi?

Koany jo, *Asamariat* ngin arai, kaitebeikin, kotoma alimonokinik naka akuare natubor, nges arai Kagar, teijo, aitupuset naitapaaritai. *Eyudayat* nges kerai Sara, araibonat arai loki-Sara. Konye *Emoit* erai loka Mariam, Aur naka Ekabakane, Aur naka Aburaam naka Ekabakane.

66 Kwana erai naisumunitai ebe kotoma apaarasia nukawasia nu, ebe elosi Edeke lopelo, Kristo Loelo, abongun ne kosodi apukor Elopet kwape Okoku loka etunganan.

Kanukinyo? Erai Ngesi ngopengol bian, lolo, ka ikaru kere. Ido arai ecamakini Ngesi Iyudayan ngul atubor kangun, kosodi ainakin kes aanyunet naka Mesia, kosodi konyet abunore angeset naka aisisianakin naka Imo ido ajalakin kes cut alomar toma kanuka asioman akiro nuka ediini, ti Nges erai lomam edolit. Ibusakinit Ngesi aswam ibore ngipengin, naarai abala Ebaibuli ebe, kotoma a-...Iburanian 13:8, "Erai Ngesi ngopengol."

Ido isumunit Ngesi kotoma Malaki 4, ka Nuiwadikatai da ngun kere nuegelegela, ebe, kotoma apaarasia nukawasia, abuni ekanisa ajaun cut becebec kwape ejaar ngesi lolo, ido apote akwapin ajaut.

Koany ber jo akwapin lolo. Kosesen ejautene loka Sodom. Koany ber jo amaran naka akwap kotoma aiboisio nuegelegela, ka iboro luejaasi aiswamaunun. Koany ber jo ekanisa kotoma aitolitoluna naejai ngesi toma, naka Babulon. Koany ber jo ekiyakia mamake, Oral Roberts ka Billy Graham.

G-r-a-h-a-m, irwan nasodit oni ajaikin kede ekiyakia, mama ejaasi ikanisan kere, loengetakini ekirorike kede h-a-m, kwape nat Abraham. A-b-r-a-h-a-m erai anyukutan akanyikaarei. G-r-a-h-a-m erai anyukutan akanyikape. Aibo do ejai ngesi? Mama ejaasi akwapin. Ikanyikape erai esula loka etunganan.

Aponi kosubai etunganan kotoma apaaran nakikanyikape. Konye ikanyikaarei erai esula loka Edeke.

67 Kwana kosesen ber jo kes kokwap kanen ko Sodom. Ido iyakiakec ngul kanen inerasi mamakec.

Konye do aibo ejai aur naka ekabakane naka Aburaam? Aibo ejai aanyunetekec, naabala Ngesi, "Kwape kejaatar kapaarasia nuka Sodom," ebe abu Edeke kobu kwap kosodi aitodiar kotoma akuan naka etunganan, kosodi alimor ngun nuajai Sara eomoomoi kokau kotoma otauke, koswam lokejai kauKe, aanyunet nakawasia eringa kemudiara akwapin nuka Imo kede akim.

Ido adau Ekanisa adumun aanyuneteke nakawasia eringa akwap kere kemudiaara, ajakaanut na naka Imo araun naemudiario kede akim ka anyunyura naka Edeke. Yesi iyuunitos ngun? [Kotemari atukos ebe, "Amen."-Ekewa.]

Ebe Melukisadek kerai akuan, abu kitodiar Elopel kotoma akuan naka etunganan; kosodi konyet ekaulo abu Ngesi koraun akuan. Kosodi kwana, lolo, erai Nges ngopengol bian, lolo, ka ikaru kere. Yesi iyuunitos ngun? [Kotemari atukos ebe, "Amen."-Ekewa.]

Ingaibo Melukisadek lo, bodo, loerai Nges ngopengoil bian, lolo... "Mam ejaunar ka papa, mam ejaunar ka toto, mam ejaunar ka ageunet naka apaarasia, mam ejaunar ka angetakinet naka aijar." Ido abu Ngesi kiriamunos ka Aburaam, ido aanyunet naka epone ali abu Ngesi kiswama? Ido ne konyet araunor Ngesi akuan, abu Ngesi kotema ebe abuni ngin ainyogoikin bobo eringa angeset naka apak. Yesi iyuunitos ngun? [Kotemari atukos ebe, "Amen."-Ekewa."] Eyuunit eong ngun. ["Amen."]

Kelipata.

68 Edeke lominat, eyuunit eong Nuiwadikatai, nuinerit Jo ebe erai Jo "ngopengol bian, lolo, ka ikaru kere." ido kwape kainakina kotoma otauca, Ejakait, ajeni eong ebe ejai ibore yenebeit aiswamaun. Mam eong apedori cut ajenun ebe inyobo ngin. Akuriana eong alimun imodiobore, Ejakait. Ijeni Jo etau loka EbulesitiKon.

Boboda kwana irwan nuipu, ageun katur neibu Jo kijukunia iboro, abu okurwok itunga ajenun. Iducokinit etunganan aiturit Edeke kanuka ngun nuabu Ngesi kiswama, ido kinera da iboro ngul luepolok luebuni Ngesi aswam, konye kopalunitos nuejai Ngesi aswam. Aso ajaunun kwape kwangin katur kere. kanukinyo amenia akelesia naka Atuluki aanyun Lokalaunan Patrick kwape enabi loka Edeke? Kanukinyo aariata kesi Joan nako Arc? Ido kereka korai ngin anabi, apotu kicweasi ngin kwape acudan. Papa, erai duc naetuboro. Ibwai Ijo ngin kama ejaasi lukacoa ka luecobe. Nges mam eraar nakaumokin ebe ibu Jo kolimok isasedotin ngul ebe, "Iladaete yesi atesin nuka inabin, ido korai yes kes ipotu ibwaikisi kes toma atesin ngun." Akaulo na inabin ngun atwakare, koanyunete do kesi aibucaretekec. Ereitos duc kesi Jo, wu Ejakait, kotoma epone edio kere loibunio Jo.

69 Elipit eong, lolo, wu Edeke, irwan atipet bon bobo. Moi itemonokit isio ajaun...alosit laiye Tucson. Aiboisio ace nuka akwap, ibugai ice luebeit isio alimonokin kotoma. Konye, Edeke lominat, epedori aticepak ojaasi ne itunga luitetiak lolo, lumam nepecep da... Eirasi kesi Akiro elimonokinio, konye komam keanyunitotor Akiror itodiar.

Kwape abu eong kelipitor Jo kotoma ageunet, neajaatar ikiyakia ngul Keleopa ka opaperoke elosete korot epote ko Emaus, kojaasi elosete korot, kosodi Jo atubun kinga kokitui kosodi ageun einer ka kes, akaulo naka ajarun, kosodi alimonokin mamakec. Kanukinyo, abu Ngesi kotema atiar, "Yes luedit aijen, luyapete itauon. Mam kereka yes ijenete ebe abeit Kristo aiticanio kotoma oboro kalu, kosodi konyet alomar toma aibusesuKe?" Konye ca kopekwangin mam kes apotu kojenutu ngun. Apaaran kere eupasi kesi kaJo, konyeca kwape kwangin mam apotu kojenutu Jo. Konye akuare adiopet...

Abu akuare kodolu, apotu kesi kingaingata Jo abunore alomun toma. Nekomariata kesi toma agola naadit naka ipejok kosodete agolokin ikekia, ibu Jo kiswama icebore koipone lope ibu Jo kiswamator eringa aibubuikiniKon, ido apotu kesi kojenutu ebe arai Kristo lokejarunit. Akaulo naka idagikan idis ibu Jo koloma kau naka aigalisit kosodi aolior. Atipet apotu kesi kokerata alimokin ikesisiak ebe, "Ajaru Ejakait cuticut!"

Papa, Edeke, eyuunit eong ebe eringa Jo ijari. Ajeni eong ebe irai Jo. Ido itigogong jo ngun mamakosi irwan nuipu noi. Ijo iswamauni ti ber bobo ngun irwan na bobo, wu Ejakait? Arai kidumunit isio asianut kakonyeneKon, kiswamaun ngin irwan na bobo. Arai eong ebulesitiKon; eraasi lu ibulesiniiKon kotoma kane. Ejakait, kere nuener eong mam ti erautu imodio...Akiror adiopet bon kamaKon ti edepa kere nuener eong kotoma akuaresia akany nu, araibonat aisiiranareta akany. Ti erai naepol adepar, Akiror adiopet bon kamaKon. Ijo mam tope ti kiner, wu Ejakait, tetere itunga ejenunete ebe alimokinit kes Abeit? Kisiik ngun, wu Edeke. Elipit eong ngun Kokiror loka Yesu, irwan na bobo. Amen.

70 Kwana, mam eong ajeni jo. Ajeni eong icetunga. Ajeni eong etelepapat loiboie *kane* lo. Ajeni eong Bill Dauch loiboie *kangina* je. Akoto eong...Ejai Onac Blair, Rodney Cox. Etiono asesin kinga nen.

Kowai *kalo*, cut kotoma apak kanapekana mam eong apedori asesen imodiotunganan, nabeit, yen ajeni eong.

Kwana idiibo kotoma kane ejenete ebe mam eong ajeni yes? Ikeutu akaninikus, ijeni jo ebe emamei ibore ajeni eong kanuikamunitos jo, ikeutu akaninikus kowaitin iarei kere.

Idiibo kotoma kane ejaasi kede ationis, araibonat icebore yen ijeni ijo ebe mam eong ajeni? Kikeutu ber yesi akaninikus.

Kwana, mam cut, cuticut eraun naepedor eong aijen imodiobore yenikamunit yes. Kopone ece, bodo, ejaun ngin alomun kama ejai apukokinio mutan nakEmoyo.

Ido kwape adaunia eong alimonokin yes akuaresia nu kere, ka lolo da, ebe mam Nges etwanit; ejai Ngesi ne, ido abu kisumun aswam ibore ngipengin. Ido abu kisumun ebe ebunit apak kotoma apaarasia nukawasia, kwape ebalor Malaki 4 ka Luka Lokalaunan, naetakanunia Ngesi bobo kotoma aput naka akuan kakidingos naka itungaKe kosodi aswam iboro ngupengul, kosodi apukor ibore ngipengin, aanyunet ngipengin naka Mesia. Idiibo ejenete ngun, ikasiomak Ebaibuli, ejenete ebe eraasi ngun Abeit? Kotemasi ebe, "Amen." [Kotemari atukos ebe, "Amen."-Ekewa.] Iburai kere koraasi ikasiomak Ebaibuli.

Kwana, ajeni eong ebe erai ibore yen itet mama ejaasi itunga lolo, konye eringa ngipengin erai Abeit. Erai kanuka ngun nges mam kes apotu kojenuiata Yesu loko Nasaret. Ajenete kesi aiyuununeta nuka ekanisakec, konye mam kes ajenete Ngesi. Konye abu Ngesi kobu koipone lope eneritor Ebaibuli; mere ekesisian nuka ediini, mere esasedoti. Abu Ngesi kobu kwape Enabi, ido mam luKeng obe apotu kijautu Nges.

71 Kwana, arai erici Edeke AkirotoKe, ido arai aticepak eong...kosodi aticepak ngin aibirokin mama ejai icetunganan yen ajeni eong, alemuni do eong icetunganan bobo. Koany, akoto eong itunganan yenimam eong ajeni. Ido akoto eong yes ailip.

Kwana, koany, ajai aberu kadiopepak naajaatar kede ationis. Abu ngin kitosomate isiriginike kama ejaasi idokitan; mam kes apedorete aingarakin nges. Kosodi ngin atemar kotauke ebe, "Korai eong tikapedo atiror anapito naka Etunganan kangol, ti eong angaleu." Yesi iitunitos akiro ngun? Aso apotu kesi kere kotamata agolor ngin kau, konye abu ngin koridar kiton neatiroria anapitoKe, kobongori kosodi aiboikin.

Kwana kopupokisi ejok. Ido neswamauna Ngesi ngun, neswamauna ngin ngun, abu Yesu kibelokin kosodi atemar ebe, "Ingaibo katiro Eong?"

Kanukinyo, abu ekiyokia Petero kitoron Nges. Aticepak abu ngesi kolimunite icebore yen ikoni ne, "Ejakait, siri kilim ibore yen ikoni nen. Iyuunete itunga ebe ejai icebore yen erono ka Jo. Naarai, neilimokinia jo kes ainyam akuanaKon ka aimat da AokotoKon, eomitos kereka kesi sek ebe ejai icebore yenaronon. Ido ibala jo ebe, 'Ingai katiro Eong?' Kanukinyo, itunga kere ejaasi atironor Jo."

Kotema Ngesi ebe, "Eebo, konye apup Eong abu agogong konyou kamaKa." Kerai ngin atiroret naetegelikina. Kwana, imodiotunganan kere ejeni ebe *apedor* nges "agogong." "Abu Eong anonokar; abu apedor konyou kamaKa."

Kosodi Ngesi angolekin atukos, kiton neabu Ngesi kodumunia aberu ace napetai, kosodi alimokin nuka ationisike naka awokot. Ido abu ngin kojenu kotoma akuanike ebe abu alele naka aokot opala. Ngin erai abeit? Kosodi Ngesi atemar ebe, "Etajara jo aiyuunikon."

Kwana, akirot naka Ayonanin kanen erai ebe *sozo*, na da erai apolouke cuticut ebe "aitajar," kakuan arai komoyo, eputo cut kere. Abu Ngesi "kitajar." Erai Ngesi-Erai Ngesi Eketajaranikon.

72 Kwana, arai kerai Ngesi ngol bian, ka epone da loabu Ngesi kiswama, kanu aitigogong ebe kejai Ngesi akidingos naka itunga, abu Mesia kisumun; ido ngol nges epone loabu Ngesi kitijenaaror Elopet, ka epone da loisumunitor Ebaibuli, abuni bodo Ngesi aswam ibore ngipengin kwana; mam tope nges tikiswama ibore ngipengin?

Itemari jo ebe, "Ngesi abu kolimunite nuikamunitos aitangale lukadekak?" Eebo!

Iburanian, Ebaibuli lope asiomunit eong kotoma kopekwana, ebalor ebe, "Yesu Kristo nges kwana erai Esasedotiwok Lopeti loetirorio kanuka akalanyanuto wok." Idiibo ejenete ebe erai ngin abeit? [Kotemari atukos ebe, "Amen."-Ekewa.] Ebalor Ebaibuli ebe erai Ngesi Esasedoti lopeti loetirerete nukakalanyanuto wok." Aso arai erai Ngesi Esasedoti lopeti ngopengol loarai Ngesi kolo, epone ali tikiswama Ngesi kwana? Ti Ngesi kiswama opone lope abu Ngesi kiswamator kolo, arai erai Ngesi Esasedoti Lopeti Ngopengol. Kwana, ipedori aticepak ijo...

Mam eong arai Esasedotikus Lopeti. Ipedori aticepak ijo atiror eong, ido eputokin kwape itiroria jo okilenikon, araibo onacekon, araibo nat ecetunganan.

73 Konye ocamak aiyuunikon kotiiro Ngesi, kosodi aanyun nuiswamaunos. Kwana, karai arai eong ebulesit loka Edeke ido alimokinit yes Abeit, elosi Edeke aitigogong ngun kwape nueraasi Abeit. Ido itigogongin do ti ngin ebe ejari Yesu Kristo lolo, ido ejai ebwoi kane. Ngin erai naabeit? [Kotemari atukos, "Amen."-Ekewa.]

Kwana, yesi ijaas kede aiyuun, ewai ber ediopet bon kotoma apak adiopet, ewai ediopet. Yesi ijaasi kede aiyuun kokinga kangina. Ejokiaar eong asalakin acuuma nainerare, naarai mam kes epedoritos aipup eong.

Akoto eong icetunganan angoliar mama ejai Edeke kosodi atemar ebe, "Edeke, mam etunganan ngol ejeni eong. Emamei ibore ejeni ngesi kanuikamunitos eong. Arai eong cut elongwau mama ejai ngesi. Konye kotiiro aiyuunika Jo, Ejakait. Kwape ijenia Jo ationis na ajaatar eong, Ejakait. Ijeni jo kere nuikamunitos eong. Ijeni jo eong, kwape ibu Jo kojenia Petero, kwape ibu Jo kojenia Natanael, kwape ibu Jo kojenia ibore arono kede aberu na ajaatar kede alele naka aokot. Ido elimokinit eong etunganan lo ebe Ijo Nges ngopengol bian, lolo, ka ikaru kere.' kanuka ngun, Ejakait, kotiiro Jo aiyuunika."

Ido arai iswamau Ngesi ngun, kosodi aitigogongor bon kane, idiibo elosete aiyuun Nges kede itauon kus kere; arai kiswama Ngesi ngun karaida kede itunganan itiopet bon, arai iarei, araibonat iuni, kanu ajenanut? [Kotemari atukos ebe, "Amen."-Ekewa.] Isirereng yes Edeke.

74 Kwana, Papa Edeke, erai na cut naejai kinga naka akanin nuka emodiotunganan kere. Ekoto korai aswam naka apedor nakomoyo. Aso elipit eong ebe kingarak eong kwana, wu Ejakait. Ajai eong toma akaninikon. Kiswama ka eong epone loitei Ijo ebe ejok. Kokiror loka Yesu. amen.

Kwana, siri kitipasunos. Kotema kaiyapepeara ka aiyapaara ebe, "Ejakait, alosi eong aijaanakin Jo. Ido ebuni ngin araut abeit, ebe, arai apedo eongatiror anapitoKon, kosodi do Jo abongokin kitorite mama ejai etunganan ngon. Itogogongi ngin mamaka ebe nuabu ngesi kinerite eraas Abeit." Ngin erai naabeit?

Idiibo eanyunitotor aputo naka Aica kangin? Iriamit akwap na kere, kanginiboisit kere, ayangasi luketatai ngin kosodete aanyanar ngin, ido kanginiboisit kere. Kwana, ejai Ngesi nepene kwana; Ediopet jepeje loenera nuikamunitos Edukone ka Elakit, Ngopengol nges ajai kuju orongat, kosodi aijang irongan kokau kanen, Ediopet ngopengol loajai kwap ne ocor ko '33, ngopengon bian, lolo, ka ikaru kere. Erai Ngesi Ngopengol.

75 Kwana, ejai aberu, ido ejenikinit ngin kwana ebe abu icebore kiswamaun. Ejai Aica ngin ijeko cut kokujuke. Ejai ngin iboie *kanepokane*, konapite esueta lopiria, araibonat ibore yen ikoni nen. Mam eong ajeni eberu ngin. Aomit eong ebe mam oni ijenanara. Erai ngin abeit. Ijo tope iyuunit ebe Edeke...Ejai ibore yen ipuda jo, ido ijo iyuunit ebe epedori Edeke apukokin mama ajai eong ationisikon? Ido arai kepukoki Ngesi eong, ijenuni do jo ebe Iburai korai apedor naka Edeke, naarai mam eong kajeni jo. Ido eyangaikini ngin aitorun toma apedor naka Edeke.

Elomuni kotoma kanu iwomit ijo ebe erai ngin. Ipedori jo ayangar ewaikon nepepe kisasedotin, anyara ngin ebe "ajokit," araibonat ipedori jo ayangar ewai nepepe kikeyuunan kosodi anyara ngin "Edeke." Kere nuiyuunit ijo, nen nges elomunia eropitikon.

Arai kepukoki Edeke eong ationisikon, ijo icamuni Ngesi kwape alucet naka ationis kangin? Mam eong ajeni ationis ngin. Konye ajeni eong, ido ijeni jo, ebe ejai icebore iswama.

E...Kwana, kocamak eong kalimok jo epone loipupio jo, ido ijenuni do jo: aipup naejalam naejijim ido nakajokan. Ajai eong aseseni Ngin kaitebeikin cut. Erai Aica ngin, Aica naataluka kokuju naka aberu.

Ido ejai aberu ngin iticanuna kede ationis kotoma akoikike. Ido esubit ationis ngin bala epoloi kotoma akoikike. Mam ngin erai naka aiboisit kana [Kotemari inac ebe, "Erai ngin abeit."-Ekwa.] Mam. Ibunit jo kokinga naka aiboisit kana mam tope? Erai ngin abeit. Ibunit jo ko Wisconsin. Ngin erai naabeit? Abeit. Kwana idau jo angaleun. Etangaleu jo aiyuunikon.

Kwana kolimokisi eong ingaibo abu aberu ngin kotiiro. Ajai eong iyadin akaisaarei kanukany awai kama ejai aberu ngin. Abu ngin kotiiro Yesu Kristo, Esasedoti Lopeti. Yesi iyuunitos ngun? [Kotemari atukos ebe, "Amen." -Ekewa.]

76 Aseseni eong aberu naabu eong kenerakinotor. Aberu na, aseseni eong nges cut, naarai, ejai ngin ailip noi kagogongu kanu ekiliokit. Abu kolimok eong ebe ajaatar ngesi kede ekiliokit...Mam ngin alimokinitor eong imodiobore kanuikamunitos ngun.

Konye ekirorike erai Ajkt. Waldrop. Ebunit ngesi ko Phoenix. Aponi kitajarunai ngin kokatwak, kosodi edokitake abunore kede nuenwakunit acuuma ido etodiete ebe ajai ekansa otauke. Abu ngin kotwanik okokoro loelipanakinere itunga. Adau kwana ngin apak naetia ai, Ajkt. Waldrop? Ikaru itomonakanyikauni kau, ido ejai ngin iboie kanen lolo, kwape ajenanut naejari. Ebunit edokitake da toma airiamun, eyangaunit e...Ebala ebe, "Epone ali epedoria aberu ngin aijar?" Konye ngesi ngin kanen, ido emamei

aanyunet naka ngol.

Eyangaunit ngin icetunganan, ido ejai ngesi ailip kanuka ngon. Kwana, ejai etunganan ngol atwanare, kede adeka naka esukali. Kwana, ngun ajeni eong. Konye kwape ijaar jo ailip...Mam jo ijeni ebe ingaibo ngon, Ajkt. Waldrop.

Elomunit ngesi ko Missouri, ido erai ekiroriKe Ejkt. Cooper. Erai ngin naabeit. Kwana, ijo iyuunit ebe ipedori jo abongor ore kongalei, ipa. Ikamunitos ngun jo, arai iyuuni ijo ngon.

77 Ejai aberu ne, ido iticanuna ngin kede ationis naka asima, ibore yen etiono noi. Mam ngin erai naka aiboisit kana. Ejai ngin iboie kokinga kanen kotoma atukos, kinga cut *ngina*. Amuno eong ebe edumuni ngin...Mam nges arai naka aiboisit kana. Ebunit ngesi ko Georgia. Miss McKenny. Ijo iyuunit ketaukon kere, ido iyuunit ebe kitangaleuni jo Edeke? Konyou aibwo, arai mam lem oni ijenanara ido arai erai ngin abeit. Etangaleu jo Yesu Kristo. Ijo iyuunit?

[Ejai Onac Branham ibelokit epurake mama ejai atukos.]

Kauka ejai etunganan loiboie kokauka. Ejai ngesi arucokin ka Edeke. Ido nuekoto ngesi; ejaatar ngesi ka ikoku yen ejaasi kede ationis naka etau. Ido ejaatar ikoku ngin kede airurum kotoma otauke, kwangin nges abala edokita. Ido ekiror loka etunganan kangol erai Ejkt. Cox. Konyou kobwo, Ejkt. Cox. "Kosodi Ngol alimokin Sara nuajai ngin aomoom kokau naka ewema, lokejai kauKe."

[Kosodi Onac Branham ainyikokin aibelokinit epurake mama ejai atukos-Ekewa.]

Nepenen aitor kiding naka icolongoi nen kama ejai ngesi, kau mot, ejai etunganan lomam elomunit kaiboisit kana, konye ebunit ko New Mexico. Mam eong aanyunitor nges, kotoma aijaraka. Ajai eong asesen nges cut kopekwana, ido ejai ngesi kauka. Ebunit ngesi ko New Mexico. Ido ejaatar etunganan ngol kede apese naeminakinit nges, ido ejai ibore erono kakituk naka apese kangin. Erai a...kuju naka akitukuke nges ejai ationis. Ido erai ekiror loka etunganan kangol Ejkt. West. Konyou ber jo aibwo, ipa. Mam eong lem ajeni nges, konye elosi Ejakait Edeke aitangaleun ikokuke.

78 Yesi iyuunitos kwana kitauonokus kere? [Kotemari atukos ebe, "Amen." Ekewa.] idiibo kayesi iyuunitos ketauon kon kere? ["Amen."] kwana, mam kereka erai Yesu ngopengol bian, lolo, ka ikaru kere? ["Amen."] ijo icamunit Nges kwana kwape Ekonitajaran? Ikeu akanikon kaju. ["Amen."] Ijo iyuunit Nges kwape Ekonitangaleon? ["Amen."]

Kane, ejai itunganan yen iboie kane, engwalangwalauna araibonat kwangin, eperi kotoma ocamu loedakere itunga.

Ijo ipedori aiirar eong kotoma acuuma nainerare na? [Kosodi Onac Branham alemar acuuma awai kosodi alosit abear angeset naka etut kosodi ainerakin kede aberu naaperi kojamu loedakere itunga luedekasi-Ekewa.] Mam eong ajeni jo. Irai bon jo aberu naiperi kanen. Korai eong kapedori aitangaleun jo, ti eong eswama ngun. Mam eong apedori aitangaleun jo.

[Kogeuni ekiliokit aimony-Ekewa.] Mam ace. Erai bon etunganan loejai toma aiyalama naepol. Aponi kitangaleunai ikokuke.

Mam eong ajeni jo. Irai jo aberu, ido arai eong ekiliokit. Erai nasodit oni airiamun nges na kotoma aijar, aomit eong. Itunga lu...?...luayangaunete jo. Kereka kaitebeikin, erai apakikon nasodit na kane; ayangaunio jo toma napena. Ibunit jo kane elwana. Iteriborit jo atwanare. Ijaatar jo kekansa. Mam erai angwalu, erai ekansa. Mam bobo nuepedorete idokitan aswam kanukon. Erai ngin abeit. Ido ijeni jo cut ebe ebeit jo atwanare; emamete bobo nuepedorete idokitan ngul aswam kanukon.

Apak adiopet ajaasi lukatapon iuni loeboiete korute loko Samaria. Kosodete lukatapon ngul atemar ebe, "Kanukinyo kiboio oni kane kiton nekitwakia oni?" Naarai, ariebo kere, aikany etengei kiton atwanare, ka ainyam idwewok bonik ka bonik. Kotemasi kesi atiar, "Arai kijesar oni kwap toma oidukurun luka lukasurup, Isuurian; arai kearata kesi oni, ebeit oni atwakare, karaida biai. Ido arai kideutu kesi oni, ibuni oni aijar." Kosodete kesi ayangar arereng ngin. Ido, kanuka aiyuun kangin, mam bon kes apotu kitajarata awatekec konye atukos kere kailleba.

Kwana, ilosi jo atwanare arai inyikok jo apero kanen. Konye mam elimokinitai jo alosit toma atukos naka lokasurup. Konye isukunyunitai jo toma togo loka Papa, ...?.,.

79 Ijai jo atwanare kede ekansa. Mam jo ipedori aijar kokinga naka Edeke. Mam jo irai nakoibuga kalo. Mam jo irai naiboisit kana. Ibunit jo kaneelwana. Ibunit jo ko Milwaukee. Erai ngin naabeit. Naabeit ngin. Abu eong kaanyu eibuga ngon. Ajeni eong nges. Erai ngin naabeit.

Ijo iyuunit? Ijo icamuni kwana Edeke kwape Eketangaleunan kon? Arai icamuni jo, mam ace arai inonok jo biai, arai iperit jo kotoma ojamu adaun apak naewoja biai, eyuunit eong, kotoma ojutenekon, ti eong konyou bobo Kokiror loka Yesu Kristo. Kasodi alemun aperitika kasodi alosit ore, kasodi aijar

kanuka aibuses naka Edeke. Ijo irimari eong, kwape enabi loka Edeke? Kanukangun konyou aibwo. Kodum angaleu! Siri ikurianaar. Konyou awai kotoma aperit kangin; ebuni Edeke aitangaleun jo. Itei jo?

Koting icetunganan nges tetere nges ebwoi kosodi adumun Agogong. Ijo iyuunit Edeke? Ocamak ber nges odum igogong yen edit mot; engaleuni ngin. Nges nen inac, itei kwana jo nges, Kokiror loka Ejakait Yesu!

Kanyoutu aibwo kasodete ainakin Edeke aiturio. Erai Nges Ngopengol bian, lolo, ka ikaru kere!

Kolot, ido kisirereng jo Ejakait Yesu Kristo. Kongaleu.



www.messagehub.info

Nuelimonokinit

William Marrion Branham

"... toma apaarasia nuka eporoto..." Apuk. 10:7